

何不借送跡剛上人入西寧二絕句

何能修竹... 杖西... 卷... 西... 山... 鐘... 弟... 弟以... 弟以...

康熙十九年庚申作

順德詩徵

陳恭尹懷何不借詩箋

昨... 我... 動... 山... 良... 泥... 焉... 懼... 依... 詞... 陳... 陳...

錦巖何蒙夫藏

九十三

江右詩存

余光裕

先生字武可、號江右、鄉籍馬岡。父尚卿、爲諸生、性至孝、潔行喜施與。光裕掇明嘉靖三十四年乙卯、公元一五五五年鄉魁、爲舉人。歷桃源縣知縣、蒙化府通判、荆府左長史、每至下車、即革常例、卻餽贈、秋毫不染舊俗、爲政廉明簡寬、告歸時、士民力力上書挽留、乃卒於官、列傳見咸豐縣志、詩章見嶺南詩存及余少飄編之廣東歷代詩鈔。

北上道中

明時攜策乏才華、雙劍凌空北斗斜。萬里長途生白髮、一年佳節負黃花。龍山風落參軍帽、仙渚煙橫博望槎。到處秋光堪買醉、休言蹤跡在天涯。

將進酒

春風瑤席珍饈羅。滿堂賓客冠峨峨。酒滿瓊卮泛綠波。徘徊一笑衰顏酡。勸君進酒莫蹉跎。百年光陰轉擲梭。對鏡忽驚髣髴疏。朝如青絲暮已皤。君不見阿房插天崖峨高。金縷錦殿皆楚戈。兀不見珠房繡戶成煙蘿。魏苑臺空鳥鵲歌。翠華一去愁經過。芙蓉泣雨淚滂沱。人生不樂逝如何。賢達託體同山阿。黃金換酒莫辭多。功名富貴亦消磨。拔劍起舞影婆娑。眼花耳熱側弁俄。繁絲急管奏陽和。醉來枕席泰華窩。酒星光照山之邁。舉杯對月邀嫦娥。量如萬斛沛江河。那知世路皆險陂。

望君山

一望奇蹤便羽翰、天開紫翠足游觀。湘妃墓古楊花白、杜毅祠荒木葉丹。山氣螺堆霄漢色、波光鏡徹斗星寒。鼎臺龍去琴聲杳、猶有漁翁弄晚湲。

旅思

野寺鐘殘北斗斜、薊門煙樹客京華。側身戎馬經過地、明月淒涼聽暮笳。

山人集

余世亨

先生字始大、鄉籍馬岡、天性任俠、不務家人產、卜居粵秀山、晚號隨時老人、著有山人集。見溫汝能纂輯之粵東詩海卷十九。

九日登江樓懷黃泰泉唐荆川二內翰

重九無花度素秋、清宵看月強登樓。蕭蕭落葉煙霜迥、浩浩長江雪浪浮。畫角幾聲淒野戍、玉人千里隔瀛洲。論文樽酒何時共、漫倚危闌看斗牛。

斗南詩草

余嘉詔

先生字彥倫、號斗南、世亨之子。明嘉靖乙丑、公元一五六五年進士。官歷合肥令、南京福建御史、以耿直忤當時權貴、乃去官回里、嘗自言曰、吾以清白傳子孫足矣、不必他求也、子孫慕效、果世其德。事略見咸豐縣志、詩章見溫汝能纂輯之粵東詩海卷三十二。

憶金陵

天作興王地、神工豈偶然。潮從東海入、山與石城連、繡幙開朱戶、笙歌擁畫船。風流佳麗地、憶別又經年。

遊香山

地接宸光近、山高王氣浮、青雲連紫禁、白日照丹邱。閣俯中原極、河分大澤流。出關行欲去、策馬且夷猶。

元日過黎氏清泉書院

冉冉春雲覆短牆、洞門天遠自風光。紅桃碧柳山初暖、翠竹黃鸝晝自長。南國陽和生瑞藹、西風浩蕩送幽香。小車莫厭頻來往、幾度尋芳恣老狂。

夜宿紫霄宮

欲從真境覓佳儔、暫借雲窗臥野翁。今夜石床青蕙帳、十年魂夢紫霄宮。簾櫳影落松虬月、殿角寒吹鐵馬風。隱几吟餘方枕就、玉梅花外幾聲鐘。

題何武庫悔齋圖

聞有大人仙、幽居傲岩麓。清宵澹沆漑、白日甘黃獨。年少焚銀魚、三冬萬卷足。白眼世途人、黃梁幾時熟。

過承天府

郢中今代邸、王氣昔來多。宮城自盤踞、陵廟鬱嵯峨。月下衣冠出、風前鐘磬和。野臣瞻望處、天保幾回歌。

寄唐內翰

北望薊門迥、龍樓旭日邊。我惟山澤老、君竟玉堂仙。魂夢常千里、音書動隔年。行藏各隨分、知有故人憐。

蘭陽吟草

余祖頤

先生字于正、一字葆惺、鄉籍馬岡、光裕之子。明萬曆乙酉、公元一五八五年舉人、初任蘭陽教諭、士鮮知學、祖頤督教有方、自是科第輩出、拔陞翰林院孔目。待親族盡禮、有古君子之風、並祀蘭陽西華名宦祠。事略見咸豐縣志、詩章見溫汝能纂輯之粵東詩海。

懷吳蟾芬

爲憶娥眉妬、空憐駿骨求。十年燈火意、萬里鬢毛秋。江葦初聽雁、山雲獨倚樓。天南瞻紫氣、寒色動吳鉤。

別劉抱白鍊師遊楚

瀟湘西路去漫漫、拄杖秋煙岳色寒。七十二峰雲影外、不知誰共月明看。

先生字伯誠、鄉籍龍頭、明成化丁未、公元一四八七年進士、選庶吉士、授翰林院編修。官歷江西提學僉事、福建右布政、性剛介、不苟合權貴、曾遭誣陷、賴諸生代爲白冤、於事乃脫、著有吹劍集。事略見咸豐縣志、詩章見溫汝能纂輯之粵東詩海卷十七。

征婦怨

十五受君聘、二十事君身。鴛衿未終歲、君爲馬上人。馬上彎弓逐強虜、鏖戰頻年歷辛苦。一朝在遠寄書回、見書哽咽未忍開。開緘更沒相思字、行行只說封侯事。封侯富貴如纖塵、枕衾恩愛如千鈞。人生若得恩長保、縞衣藜食終身好。爭奈鸞鳳各自飛、日日紅顏鏡中老。

度庾關

庾關前、庾關後、馬蹄蹙歷行人瘦。寒梅樹老不開花、怪石巖深有虛竇。我曾棹鞅從關右、十年不歸路如舊。不應雙鬢漸蒼浪、愧見山靈行逗遛。吁、噫嘻、關路險、關路艱、盤旋百折青雲間。曲江祠廟官道左、流泉漱石聲潺潺。遊人過日公莫笑、鼎鼎功名今古難。

謁岳武穆墓

敷天左袒不須疑、誤溺偏安失事機。天運未移宗社在、御衣曾付閣門歸。書生先叩胡兒馬、奸相終啣岳字旗。千百年來冤恨在、雨中松柏尚歔歔。

伯仲之間見武侯、中原一鶚正橫秋。諸君未痛黃龍飲、片紙翻令白日愁。萬里長城真自壞、十年積力爲何休。可憐壯士中興恨、百戰山河半未收。

長沙道中新寒

寒氣如砭入客舟、芙蓉凋盡楚江愁。朝吟尚擁公孫被、夜坐惟披晏子裘。黃葦葉旁銀露結、丹楓樹杪火星流。昨宵夢得西遊路、玉壘峰前是益州。

古愚集

蘇仲

先生字亞夫、鄉籍龍頭、乃蘇葵從弟。明宏治壬戌、公元一五零二年進士、授戶部主事、遷象州知州、時象州有巨賊、累與官敵、仲至悉捕誅之、又嘗出令、招撫猺獞族人、俱皆聞風歸化、賢能遠達朝廷。著有古愚集。事略見咸豐縣志、詩見溫汝能纂輯之粵東詩海卷十八。

閨詞

妾本名家女、生長不出門。嚴慈有訓誡、諷誦常書紳。坤道本巽順、女德在守身。習成禮義性、自覺芝蘭薰。年當十四五、偶值數厄屯、有斧柯不伐、有媒不成親。自甘不偶分、寧爲標梅嗔。深閨弄針線、繡出鴛鴦裙。開奩對粧鏡、髻抹巫山雲。悠悠過白日、堂堂背青春。餘齡四十外、黃氣眉頭新。蛛絲知有喜、鳩鵲能通神。結褵遂夙願、一朝嫁良人。相看各嫵媚、和氣盛氤氳。鶴鳴而子和、恩義魚水敦。初蘭已成佩、製錦將爲紋。豈知人心異、背面楚與秦。舊人漸失愛、新者轉殷勤。冬裘切肌骨、秋扇生埃塵。我不爲參商、胡爲各升沉。我不爲草木、胡爲異蘭芬。我但知有天、天胡不我聞。耳目各有別、視聽良非真。謂深非瀚海、謂高非崑崙。鐘鼎無銖兩、一羽成千鈞。蛙鳴等鼓吹、蟬噪愈簫笙。紙窗粉難白、茜裙染不殷。辨冰不作水、未必知寒溫。語霧良非煙、氣類實有分。差之忽毫釐、謬以千里云。順夫回此心、更期推至仁。妾心本無薄、妾貌光燐燐。眉宇自神采、豈效西施顰。嗟哉甘落寞、異室隔朝昏。殘燈對長夜、寒瓢守孤貧。病馬不舉首、孤鶴長驚魂。長門有遺恨、空託相如文。班姬寄心跡、作賦聊自陳。妾身芥可比、妾命毛可倫。敢望黃金室、爲我烹羔豚。敢冀白玉堂、爲我開芳樽。時兮不我住、日月如飛輪。我命終不良、我生胡不辰。但祈垂舊念、無俾竟沉淪。得如狗馬願、伏櫪羈殘生。

樂善堂稿

蘇方晉

先生字紹節、鄉籍龍頭、號天倪。蘇仲之子。明宏治副貢生、著有樂善堂稿。見溫汝能纂輯之粵東詩海卷十九。

仲春即事

抵掌幾升沉、朝花劇一吟。杯棬寧不古、犬馬可無今。檻外時光迅、階前雨氣深。且兼多近況、長笑聽啼禽。

春日有感

刺桐花落碧闌空、鶉鳩聲中思萬重。驃騎未提三尺劍、羽林寧挽六鈞弓。蓬婆戍遠寒雲暝、鐵甕城高夕照紅。借問月氏何日尅、將軍誰是漢英雄。

草系精舍次羅邑侯韻

結搆雲霞笑自如、林間散髮夕陽初。蕭疎翠竹王猷宅、冶艷黃花靖節居。東郭短筇酣醉後、北山高枕夢魂餘。問奇間有人相識、靜鎖蓬窗解著書。

都諫稿

蘇應旻

先生字萃貞、鄉籍龍頭、明嘉靖己未、公元一五三五年進士、官至給事中、著有都諫稿。事略見咸豐縣志、詩一章見溫汝能纂之粵東詩海卷二十三。

萬仙亭

層雲森古寺、返照靜漁磯。山色水傳遠、溪聲松助之。聽經孤鶴舞、採藥一僧歸。安得如來者、高談慰所思。

讀易堂稿

蘇昇

先生字孺子、號紫輿、鄉籍碧江、明萬曆丙辰、公元一六一六年進士。歷官新建縣知縣、

著有讀易堂稿。事略見咸豐縣志、詩章見溫汝能纂輯之粵東詩海卷四十五。

玉嶺駐車

剩有春前色、看花不記名。鳥啼流水和、車駐白雲迎。山曲藏樵語、林疏見野平。何當恣幽賞、閒望有餘青。

西昌九月

重陽無地不登臺、萬里西風送雁來。荷葉尚餘南國色、菊花不似故園開。蘇卿履謝人何處、徐穉亭孤榻已灰。千載憑高徒記憶、好將生事問金壘。

章江憶故園二首

五月江深似海潮、臨流一望暑全消、不知小築當門水、此日何人過板橋。
潮入孤村灌小池、新泉正好濯纓時、隔溪應有人來往、五月年年折荔枝。

桐柏山房集

蘇景熙

先生字汝載、鄉籍待考、自號聞道人、明代諸生、性忼爽任俠、詩文瘦硬如其人、著有桐柏山房集。詩章見溫汝能纂輯之粵東詩海卷四十五。

今日非昨日

今日非昨日、今年異去年。請君但沽酒、莫惜杖頭錢。不信吾生終餓死、得失置之休問天。
園有花

園有花、尊有酒、世間萬事無不朽。昨日美少年、今朝窮白首、黃金點不成、大藥亦何有。

峽溪山

絕壑臨無地、虛巖別有天。斜通一線徑、俯落百重泉。組練明秋水、江山入暝煙。汀覺與沙雁、相對意悠然。

南枝草堂遺稿

薛始亨

先生別署剛生、一署劍道人、鄉籍龍江。父天植、明萬曆丙午、公元一六零六年舉人、官閩清令、治績丕著、擢戶部主事。始亨擅詩古文詞、兼通琴棋曲藝、好飲酒擊劍、乃棄儒冠學道、因號劍道人。著有劍道人集及南枝堂集。列傳見咸豐版縣志。詩章見番禺汪宗衍著之廣東書畫徵獻錄又見番禺凌揚藻評輯之嶺海詩鈔卷四。

自書西郊詩卷

西郊芳草碧於天、柳葉梨花盡帶煙、故國可憐人事改、春春春在馬蹄邊。

又

干戈催我出青山、深愧名閒實未閒、久別故人思一見、朝朝朝恨隔西關。

自書詩葉

絃琴韶石月、花滿曲江春。百里歌吾父、三山有美人。麥岐行轡路、風葉訟庭塵。欲飲曹溪水、來看野雉馴。

詠懷

魚目詫明月、瓦釜夸黃鐘。子野久已矣、離朱難再逢。策名爲譽鵠、落魄成譏叢。豈敢慕黃虞、兢兢多苦衷。圭竇蒿萊沒、時有虎狼蹤。

春日登西樵山

幽慮積不展、春霽試登陟。綿綿朝浦雲、荒荒東野日。陵隰已萋榮、凱風漸披拂。恣策先徒旅、窮梯歷險仄。羈懷攬茲辰、緣感涕霑臆。兩儀經俶擾、一紀殊憫默。節候愆芳歲、佳期緬遺佚。夙欽梁鴻隱、遠慕孫登識。于郊恒利需、固志鞏用革。潛淵未徙溟、薄漢方垂翼。神皋澹孤崕、異境資冥索。獨撫邱中琴、絃絕成悽惻。

送屈子

開歲觀青陽、廣陌春風靡。之子不寧居、挾策適萬里。同心忽異域、遠送情何已。執手臨江邊、天涯從此始。濁世紛讒人、行高來盛毀。鷓鴣嚇鳳凰、蕭艾蔽蘭芷。曠古無鍾期、弦張不如弛。君爲孤生松、我作幽澗水。願言勉令德、酌子盈觴旨。

本末山房稿

薛起蛟

先生字牟山、一字炎洲、又字焰萬、鄉籍龍江。明諸生、中明經科、與兄始亨並有文名、學者稱小薛以別之。爲文力追柳州、尤工史學、受聘修諸邑志乘、考核精當、年九十猶喜讀書、暇則臨摹古帖、人爭寶之。著有本末山房稿傳世。事略詩章、並見番禺凌揚藻評輯之嶺海詩鈔卷四。

南屯謠

伯郡生南屯、託體詫天狼。豐毛自居養、五色爛其章。嗚嘯振林木、詡詡獸中王、羆彪群相隨、跳躑噬麋麋。几上旣足肉、遑及問壺漿。俯視一何雄、顧盼生威光。雨雪旣弗及、何況患陰陽。恣情獵志氣、一怒烏敢當。爲樂朝復暮、千載豈云長。胡乃毛間物、浸淫在膏肓。薄蝕潰心腹、因之露肺腸。大命久已去、餘勇賈不遑。覆巢宛入室、本揭枝亦傷。山高每陵遲、海深波易狂。君子不登高、臨深如履霜。書戒凜馭朽、慮下智斯臧。豚犬比食牛、仲謀名乃揚。

送陳將軍鞏甯遊燕都

曙色嚴程戒曉寒、蒯緱行向薊門彈。雙旄妒落崑城印、百戰名標大將壇。走馬長安塵撲面、聽歌燕市髮衝冠。故人秋待歸期早、朔雪防侵舊箭瘢。

石林清嘯集

張佃

先生字勤夫、鄉籍待考、明代諸生、事略待訪、遺著有石林清嘯集。詩章見溫汝能纂輯之粵東詩海卷三十三。

邊上

夜夜三邊動鼓聲、遼陽烽火達關西。風吹馬勒寒初起、塵暗龍城日未低。原上飢兵攢草臥、磧中新鬼望鄉啼。李陵一去胡天渺、愁見黃雲鎖汭溪。

張生詩存

張鳴韶

先生鄉籍待考、事略未詳、詩章見鄒崖逋者鈔讀之嶺南詩存附注曰順德人、明諸生。

崖門

兩崖波浪撼乾坤、龍戰曾看擁至尊。一日未亡猶正統、普天何處不中原。殘營尚帶孤棲恨、瀕海難消故國魂。夷夏升沈還此地、萬山愁黛向黃昏。

貞民之詩

張秉壬

公字壽夫、號訥菴、鄉籍龍山沙富、乃明代按察司僉事張善昭之父、有武略、常率土兵禦寇、以衛鄉鄰。粵使者乃表其里曰貞民。事略與詩章見公元一九三五年歲乙亥溫肅輯錄之龍山詩錄卷上。

自述

大藥分明產世間、看時似易用時難、自慚未遇鍾期侶、盡日囊琴誓不彈。

勉子從學肄業

函丈親宜炙、江水一篋輕。是誰無別恨、欲汝達時名。文用三冬足、才須七步成。阿符宜勉力、韓愈鬢星星。

流光詩章

張善昭

公字彥光、號臥雲、鄉籍龍山沙富。明天順壬午、公元一四六二年舉人、讀書成均、試吏部高等、授兵部司務、官至四川按察司僉事、生平尚氣義、周厚本枝、逮於鄉黨。遺著有流光詩草。事略見咸豐縣志、詩章見一九三五年歲乙亥溫肅輯錄之龍山詩錄卷上。

樟樹別戴伯元

花影著船仍逐浪、鶯聲到耳似誇春、殷勤吩咐堤邊柳、莫把柔條繫遠人。

前題之二

渺渺江湖日欲低、淡雲籠雨眼中迷、東風不與行人去、只管催鶯故故啼。

蘭溪懷人

染將楓葉滿江丹、映我桅帆下浙湍。風送潮聲來枕上、雁驚客夢轉江干。多情明月同誰羨、滿眼江山祇自看。買得蘭溪獨酌罷、一聲江笛數聲寒。

掃墳

春來雨露一悽然、酌罷芳阡涕欲漣。幾處江山春景象、九原松柏舊風煙。浮雲世事猶千古、流水桃花似去年。回首不堪聞杜宇、吟魂銷斷夕陽邊。

答龍江諸友韻

卜居仙里總豪家、幾欲過從隔水涯。岩下流杯分澗水、石邊移榻掃松花。清秋別夢魂應斷、明月離懷興獨嘉。何日一樽能邂逅、開顏醉倒玉山斜。

送友人之京得山字

雲暖沙晴花正殷、丹心戀主出鄉關。今朝別袂此杯酒、明日吟懷何處山。孤客秦淮三島夢、少年魏闕九霄班。長安問看柳園事、依舊東風任往還。

虛齋詩存

張拱辰

公字仰德、號虛齋、鄉籍龍山沙富、乃張善昭族子。明正德丁丑、公元一五一七年進士、授戶部主事、官歷郎中監、福建布政司參議、居官清白、宦倦歸里、耘瓜園圃以終、祀郡學鄉賢祠。事略見咸豐縣志、詩章見公元一九三五年乙亥溫肅輯錄之龍山詩錄卷上。

峽

峽山高兮千尋、峽流險兮淺淫。障白日於晴空、潑岩崖之微陰。碧草萋菲、怪石峨巍。山鬼夜哭、鷓鴣朝啼。聆惜春波兮日瀾漫、中流一箭兮飛奔遄。遊人值此兮命難存。余舟已濟兮心猶酸。拉長年與三老兮正襟而訴之。莫余行其少邁兮顧流而易之。乘白日之餘光兮擇芳渚而憩之。桂棹兮蘭槳、神明兮翱翔。有酒兮酤我、共酌兮斜陽。

雞鳴山

雞鳴山下凝雙眼、不見雞鳴空斷橋、寂寂葩園誰稷黍、竚隨流水恨前朝。

遊賈氏園

莫嫌歲晚看花遲、到我來時有紫薇、謾捲輕羅當新酒、明朝風急恐離披。

治齋吟草

張淮

公字景禹、號治齋、鄉籍龍山沙富、明正德丁丑、公元一五一七年進士。官歷浙江省台州府知府、廣西省潯州府知府、貴州省都勻府知府。事略見咸豐縣志、詩章見公元一九三五年歲乙亥溫肅輯錄之龍山詩錄卷上。

勉齋號

兢兢惕惕抱書眠、豪放乾坤喜壯年。窗外蘭芽春信好、壁間篁影日華遷。植槐栽柳天將定、弄月吟風夜轉乾。慚愧鬚長開綠野、共題深樹壁陶篇。

張氏正聲

張潔

公字景川、鄉籍龍山沙富、乃張善昭孫。生而秀朗、年十五入邑庠、明正德甲戌、公元一五一四年進士、授建平令、邑號難治、至則召長老問疾苦、力爲興革、嘗重修范文正公祠、政聲載道、遷禮部精膳員外郎、嘉靖間以因事與衆直諫、同受廷杖而死、卒年三十八、及隆慶改元、追贈太常寺少卿、祀郡學鄉賢祠。事略見咸豐縣志、詩章見公元一九三五年歲乙亥溫肅輯錄之龍山詩錄卷上。

立秋後感

金盞銀盤麗短牆、秋來依舊菊花香、有時閉戶避桃李、孤負一春無酒嘗。

宮詞答孫南城

從新梳洗插宮花、欲伴君王作紫霞、銀燭夜深人不語、幾回飛夢到官家。

獨坐

菊花原不待秋開、自對東籬自舉杯、莫把輕枝鬥風雨、重陽問我賦歸來。

懷英太守天彝廣行不至

酌罷瀟灘酒、登樓日日心、是誰過剡棹、想殺月華臨。
蕭蕭驚落木、颯颯響秋風、無數閨人恨、凝眸數過鴻。
芳草連天碧、蒼煙滿眼飛、離心正斷絕、獨宿倩誰知。
雪焰飄飄舞、梅魂默默催、一心隨斗柄、特地望春回。

次龍橋方棠南郊陪祭韻

天子祀南壇、龍光一道寒。街墀臨月姥、花柳覆仙官。候駕旌旄擁、焚柴袞冕看。至誠聞監格、雅頌表心丹。

靜觀之得

張鏢

公字文穎、又字紫峰、又字靜觀、鄉籍龍山沙富、明弘治甲子、公元一五零四年舉人、官歷廣西柳州知府。事略見咸豐縣志、詩章見一九三五年歲乙亥溫肅輯錄之龍山詩錄卷上。

吳中思親寄兄柏山

思親無計得歸家、惆悵危樓對落花。枕上三更羈旅夢、眼中兩度早春華。山窗破曉鶯啼樹、水郭排青竹映沙。自笑爲謀真太拙、一身孤立見天涯。

沙富流風

張希載

公字博之、號柏山、鄉籍龍山沙富。明正德丁卯、公元一五零七年歲貢、以嘗從陳白沙先生遊、乃學有端緒、性復和藹、歷任湖南長沙攸縣教諭、故一時士多薰其德化、晚年與湛甘泉等往來西樵間、迭主講席。事略見咸豐縣志、詩章見歲乙亥溫肅輯錄之龍山詩錄卷上

錢塘江頭紀興

尋真偶過大明菴、斗徑紆迴步不堪。傍竹幽禽啼欲暮、眠雲老衲夢初酣。歸心時逐江流急、逸興春從樹色貪。更欲振衣千仞去、笑將行止與時參。

沐恩歸養卷送吳希之還瓊山

客裏那堪一送君、歸心幾度逐溪雲。九重雨露新承寵、萬里舟航只爲親。煮蕨自知甘列鼎、鋪霞偏覺勝重裯。彩衣歲歲堂前舞、不愧當年奉檄人。

過長陵

三月春光滿畫屏、侵晨策馬過長陵。遙看山碧連天碧、細聽人聲似鳥聲。展轉不禁懷抱惡、間關方覺利名輕。他時倘遂投閒計、呼酒東籬泛菊英。

綠樹山房集

張在瑗

先生字衛寶、號遽度、鄉籍龍山、張希載之玄孫。家學淵源、著有綠樹山房集。事略與詩一首、見一九三五年歲乙亥溫肅輯錄之龍山詩錄卷上。

偕黃耀之潘子霖曾篤卿登金紫峰

夷歌處處喚愁襟、懶向珠林聽梵音。天地不堪還寄傲、江山何意復登臨。誰將桂樹仍招隱、肯信桃源可重尋。且喜一觴時一詠、悠悠天外和龍吟。

雪崖詩草

張彥修

先生號雪崖、鄉籍龍山。事略欠詳、詩二章見一九三五年乙亥溫肅輯錄之龍山詩錄卷上。

舟行有感

擊棹東行恨轉賒、江流徒自促年華。因思戎馬征隨急、減卻滄州幾釣槎。

懷舊

百年天地德何孤、洗卻塵心半點無。幾上仲宣樓外望、落霞飛處墜金烏。

平臺詩草

張洙

先生號平臺、鄉籍龍山沙富、事略待考。詩章見乙亥溫肅輯錄之龍山詩錄卷上。

西樵道中和海姪

樵山屹立看、巨鎮難尋尺。峭峭插天峰、巉巖臥雲石。青壁若開屏、丹崖猶列戟。高登絕頂中、一抹長空白。

懷舊

憶昔與君遊、兩兩飛仙步。長袖挹風清、短鋏履月素。夜半始歸來、溪邊頻呼渡。萬籟寂空山、古木濃零露。窈窕踏歌行、錯落群星布。如何今日遊、寂寞空歸路。

景翁詩草

張溥

先生字景大、鄉籍龍山沙富、明嘉靖庚子、公元一五四零年舉人、官歷山東青城縣知縣。事略與詩章見一九三五年乙亥溫肅輯錄之龍山詩錄卷上。

清源舟中別羅荔城

逆旅相逢意惘然、十年魂夢一燈前。雖教乍見相分手、猶勝山陰夜雪船。

勉齋號

黃子留芳揭海東、今人心事古人同。乾坤性分須當盡、濂洛誠明可著功。璞玉精神憑石板、兼金顏色寄鑪紅。相逢莫道無參朮、都在梁公藥篋中。

懷人

江鯉應難製、冥鴻不可招。落梅歌一曲、風雨夜瀟瀟。

登金紫閣訪上人次韻

石壁青宜賞、松臺迥可尋。客飛亭午鳥、鐘落上方音。色相岩花瘦、依微野樹陰。無緣莫扣扣、留詠覺蕭森。

居易閒吟

張鑰

先生字居易、鄉籍龍山沙富、按公元一九三五年乙亥溫肅輯錄之龍山詩錄卷上、所注爲明代諸生、事略待考。

代柬鄧順之

自君之出矣、促帚掃庭除。除除塵斷染、何日儲君車。

定準辰香

春日入郊墟、孤村隱煙樹。犬吠買茶人、路迷爭渡去。

張老詩存

張應泰

先生鄉籍龍江、明萬曆壬子、公元一六一二年舉人。官歷邵武縣知縣。事略見咸豐縣志選舉表、詩章見溫汝能纂輯之粵東詩海卷四十四。

初至邵武

何以臨民上、而登父母堂。一經曾跼蹐、百里更愴惶。樵水東流大、龍湖西望長。昔人誰可羨、推轂有輝光。

留別諸子

揮手豈無淚、春風滿水涯。一官堪自笑、白首更何爲。去路看蓬梗、前山望武夷。悠然正行役、歸計不勝思。

蒲谷集

岑萬

先生字體一、鄉籍沙滘。明嘉靖丙戌、公元一五二六年進士、授戶部主事、官歷河南右布政使、以老去官。著有蒲谷集。事略見咸豐縣志、詩章見溫汝能纂輯之粵東詩海卷二十一古行路難效駱賓王

君不見漢家漠北多王庭、胡兒百萬窺邊城。烽火終宵煙焰起、羽書結轍續紛行。龍韜太社傳綸綍、虎將中軍嚴鼓鉦。揮戈止日長城窟、帶甲連雲細柳營。星斗迢迢迴北極、風雨淒淒暗南國。青鳶旗映紫貂裘、白馬轡擁黃金勒。雷轟電掣驅前騎、鵬運鷹揚開石翼。燕然山上殺聲連、雁門塞下漢威宣。軍令五申浮玉笋、皇恩三錫照金蓮。暑往寒來驚六琯、歌臺舞榭音書斷。三春梅柳別情多、千里相思衣帶緩。行路難、吹劍高歌棲賀蘭。原將功列麒麟閣、一任衾橫翡翠寒。

珠江留別倫彥周諸公次韻

扶胥雨霽鶴初回、秋水清風梵宇臺。遷客誰憐遊海曲、憑虛吾欲入天台。人間錦瑟寧須鼓、江上芙蓉獨未開。珍重臨風數杯酒、歸期先約隴頭梅。

秋江翫月歌王靜齋中舍時在舟中

今夕此何夕、弄月江上秋。秋江水清淺、上有黃蘆洲。黃蘆洲月來天上、倒景卻向銀河流。把酒問明月、清光今幾何。如何今年景、還比去年多。去年看月坐空閣、今宵看月臨素波。波光月色兩相射、與君翫之發商歌。斟美酒、百千巡。鸕鶿解換玉樓春。竹間村犬吠衍衍、山風颯颯吹殘雲。漁笛一聲愁殺人。

宿龍泉再用簡州韻

芙蓉雲帳望中微、碧樹青莎靜掩扉。萬里萍蓬嘆飄轉、廿年衣馬未輕肥。樓臺幾處人吹笛、砧杵誰家夜搗衣。青鳥不來鄉國異、關河回首夜遲遲。

小谷集

岑用賓

先生字允穆、乃岑萬之長子。明嘉靖己未、公元一五五九年進士。授衢州推官、擢陞南京戶科給事中、奏章凡數十上、勸經筵、崇正學、擇師儒、舉遺逸、減織造諸端爲要務。著有小谷集。事略見咸豐縣志、詩章見溫汝能纂輯之粵東詩海卷二十九。

題劉御史峨崧墓

北郭荒郊多墓田、白楊青草自年年。千秋欲下雍門淚、此日猶傳京兆阡。鄒母寒零荒鮮地、王哀忍誦蓼莪篇。寒雲落照棲鴉晚、愁對殘碑一愴然。

贈戰貢士歸楚

楓葉蕭蕭間去津、臨岐把袂一沾巾。千峰白雁逢歸客、三徑黃花候主人。司馬遠遊多博物、相如能賦亦甘貧。瀟湘赤壁堪乘興、憶爾應知入夢頻。

一樹齋集

馮昌歷

公字文孺、鄉籍北水、明萬歷庚子、公元一六零零年舉人、官歷寶坻縣令、以母年老而告歸、晚年閉門習靜、若預知自卒之期、門人稱明善先生、著有一樹齋集。事略見咸豐縣志選舉表、詩章見溫汝能纂輯之粵東詩海卷四十二。

山居

幽居無一事、靜者意常閒。竹院何人到、柴門晝亦關。蟬聲深樹裏、秋色古松間。坐待空林月、迢遙出遠山。

舟中解夏

十旬禁足只居船、不定伽藍處處圓。活水有源恒說法、紅塵不到任安禪。楊花浪裏晴生雨、蘆荻洲中日似年。秋色一帆歸去好、北堂歡對月娟娟。

秋夜偕諸生月下誦桂子月中落之句因以爲韻

穴山人境寂、秋光轉清霽、幽人坐夜深、披衣對叢桂。
箕踞忘形骸、揮塵秋名理、孰是意中人、相攜二三子。
長空淨無塵、皎皎懸明月、何處來鐘聲、身心忽超絕。
大地渾如鏡、森羅影現中、清輝涼徹骨、疑是廣寒宮。
指揮鐵如意、長笑動山岳、夜半放光明、溶溶漫碧落。

登錦巖示若一若思平子

塔然片石坐崔嵬、四壁群峰擁翠來、一盞春醪澆塊壘、岩花朵朵向人開。

偶拈

世間何事最希奇、東畔紅輪西夜垂、何必魯陽戈一指、直教寸刻不曾移。

驟背吟草

馮元基

先生字宏子、鄉籍待考、明代諸生。詩章見溫汝能纂輯之粵東詩海卷五十五。

增江道中

芳草碧淒淒、斜陽向客低、竹光搖古道、樹色繞長溪。酒每村中醉、詩多驟背題。離家雖未久、又聽子規啼。

鄉旋留別區吉先朱昌藩

歸心雖已切、未忍即離群。不覺三春暮、相將岐路分。花間餘落日、竹外隱行雲。卻惜鶯聲好、明朝空聽聞。

宮花溪道中作

山北山南路正長、東風吹送野花香。數聲啼鳥知春雨、一路歸人背夕陽。溪水長年流不盡、嶺雲終日變無常。身逢勝迹應難遍、遊思蕭條轉易傷。

紫雲閣詩集

馮顯忠

公字遇良、又字擎天、又字介孚、鄉籍龍山旺村、明天啓丁卯、公元一六二七年舉人、與陳巖野先生有姻親之誼、遺著有紫雲閣詩集。事略與詩章見乙亥溫肅輯錄之龍山詩錄。

甲戌除夕

數事空嗟歲、懽情漫酌醪。兒童爭爆竹、老大歎霜毛。處處年光醉、家家春興豪。怡情時共暢、何事首重搔。

喜溫覺斯歸自滇南

思君忽已報君還、兩載風煙夢裏顏。抵掌談奇隨意快、拈杯憶昔悵時艱。窮山遠上峰峰秀、涉水言歸曲曲灣。留得奚囊名勝句、遨遊寧負鬢毛斑。

金峰酬唱

溫玉振

先生字覺斯、鄉籍龍山大陳涌、少好古文詞、長尤博洽、爲有明一代儒士、惜文章憎命、久困於諸生之列、遂浪遊閩、越、吳、楚、齊、魯、燕、趙諸山水之間、更兩度古滇、以抒懷抱、偶因株連訟事、終得同里藩使劉觀光慨陳當道而直之、遂飲酒讀書、老而尚健、年九十乃卒。事略見咸豐縣志、詩章見乙亥溫肅輯錄之龍山詩錄卷上。

三十年前飲友人張龍門宅賦詩有煙流山頂動雨過澗毛芳之句久不復記今蓬度世兄書來猶能及之撫今追昔慨然動念足成一律以寄

疇昔偕吾友、開軒共舉觴。煙流山頂動、雨過澗毛芳。少別成千古、餘暉憶義方。青箱傳不泯、世講意偏長。

得蓬度張世兄書卻記

不忘孔子是通家、錦字飛來筆燦花。疏散自分同阮籍、劍光誰許問張華。聽鶯屢醉金峰酒、選石閒烹玉井茶。高韻勝情能復幾、有懷吾擬賦蒹葭。

答蓬度張世兄喜余過訪次韻

曾攜藜杖拂煙蘿、半醉聞歌喚奈何。一往情深猶似昔、千秋期許向誰多。葛巾且效陶彭澤、裹革休欺老伏波。老我發狂偏不厭、聽松看竹數相過。

深竹閒園吟草

趙鶴良

先生字茂文、鄉籍待考、明代諸生、著有深竹閒園吟草、見溫汝能纂輯之粵東詩海卷卅九

感時

北望自心驚、黃巾擾未平。材官充上國、車騎滿邊城。處處輸錢粟、人人苦革兵。妖氛如未掃、何以請長纓。

一德稿

趙不易

先生字秉庸、鄉籍待考。明代郡庠生、著有一德稿。見溫汝能纂輯之粵東詩海卷十五。

楊柳雙禽

午樹垂楊繞汴隄、錦帆去後草萋萋、迷樓紅粉俱塵土、野鳥逢春空自啼。

迎西館集

趙不踰

先生字秉規、鄉籍待考、明代布衣、著有迎西館集。見溫汝能纂輯之粵東詩海卷十六。

舟泊四會新路

新路維舟晚、江空客況清。人居臨水語、漁火隔沙明。夜靜蟲聲切、秋高雁影橫。離家纔兩日、便有故鄉情。

珠海別意

落葉微霜古寺秋、行人臨發重遲留。離情未盡三杯酒、歸興都隨一葉舟。殘月斷猿江上路、夕陽紅樹驛邊樓。明朝獨倚河橋暮、人自相思水自流。

閒言集

趙善諫

先生字景行、鄉籍待考、著有閒言集。見溫汝能纂輯之粵東詩海卷十七。明代布衣。

撫琴歌

溪亭夜半秋籟清、松篁遠近煙光凝、太湖石是知音者、愛我流水聲泠泠。

漁人

浦口鳴榔急、清江水漫流、得魚便沽酒、明月在扁舟。

朱烏洞集

趙善鳴

先生字元默、鄉籍龍江、明宏治辛酉、公元一五零一年舉人。官歷曲靖知府、曾游於新會

陳白沙先生之門、著有朱烏洞集。按咸豐縣志選舉表爲趙鳴善、詩章見溫汝能纂輯之粵東詩海卷十八。

珠江七夕別覺山洪侍御

黃木灣頭秋水清、美人江上掛帆行。樽前莫惜此回醉、別後有懷空寄聲。珠海月明仙舫並、銀河星爛鵲橋平。人間天上團圓會、不道明朝兩地情。

遊海珠寺

渺渺煙波護佛燈、迴瀾光浸海雲騰。濤聲入座清饒几、客子維舟靜對僧。兩岸樓臺隨景見、長江帆影與時更。此中妙義原無住、正是禪家第一層。

東臺集

趙崇信

先生字繼周（咸豐縣志）維周、又字仲履、鄉籍碧江。明嘉靖乙未、公元一五三五年登進士、官歷貴州按察司副使、著有東臺集。事略見咸豐縣志選舉表、詩章見溫汝能纂輯之粵東詩海卷二十三。

挹泉亭

舊遊隨處足堪誇、兩度飛來興轉嘉。搗藥老僧忘入定、吠泉仙犬只眠花。洞岩幾處風煙古、樓閣諸天薜荔斜。一水紅塵填不滿、千秋長泛利名槎。

游海珠寺

紅槿黃蓮開渡頭、煙花不減到瀛洲。人間勝地風塵隔、石上長江歲月流。時事不關僧對語、瀟湘無夢夜乘舟。菴葭泛泛生寒溜、紅日遠天鐘鼓樓。

遇雨

戍角聲悲已十年、客心聞戰益淒然。小溪積雨傾盆下、不爲蠻方洗瘴煙。

劉氏吟草

劉觀光

公字觀國、鄉籍龍山。明萬曆甲辰、公元一六零四年進士、官歷山東左布政使、祀邑學鄉賢祠。事略見咸豐縣志選舉表、附有曾誤植爲南海云。詩章附注事略、見一九三五年乙亥溫肅輯錄之龍山詩錄卷上。

題紫閣山房

崔巍紫閣高峰寒、蒼崖削鐵翳雲端。環除幽鳥調絃管、繞屋修竹森琅玕、高人抱膝坐長嘯、鬘櫛都忘已側冠。醉裏不知天地小、颯颯臨風琴一彈。

朱石室嘯園

清時何事羨蘇門、長嘯悠然道自存。數部鼓吹頻送響、六街車馬不聞喧。逍遙可續成公賦、箕踞誰同阮籍言。不必攀躋窮半嶺、疏林修竹自爲園。

杜門吟草

劉士奇

公字邦正、鄉籍龍江、明正德丁丑、公元一五一七年進士、官歷刑部主事、員外郎。嘗以事與龍山張濂伏闕哭諫、受廷杖幾死。已而遷任山東右布政、治獄平寇、所至著績、旋病告歸、杜門八年而卒、祀鄉賢祠。事略見咸豐縣志、詩章見溫汝能纂輯之粵東詩海卷十九謝程太史松溪惠樵茶

辛夷簾下憶盧仝、封寄情深諫議通。乍閱百團渾似月、不須七椀便生風。雲鐺屢挹聞香冽、松籟旋聽覺慮空。向道蒙山武夷勝、豈知樵澗摘春叢。

遊仙壇

獨憐邱壑滌塵襟、竹杖芒鞋歷翠岑、借問仙壇何處是、望中煙樹碧雲深。

汝翁吟草

洗光

公字汝實、號羅江、鄉籍大羅村。明弘治丙辰、公元一四九六年進士、官歷南京工部右侍郎、有政聲、歿祀鄉賢祠。子孫俱顯貴、事略見咸豐縣志、詩章見溫汝能纂輯之粵東詩海

春泉

出汲人看紫陌長、環隄新漲自仙鄉。雪消山館千家潤、花落溪橋萬井香。清冷爲肌憐浩潔、縈紆如性欲汪洋。扁舟不用桃源去、細雨江聲到草堂。

秋夜聞砧

誰家夫壻安邊戍、夜搗寒砧動客居。秋老不隨黃葉盡、月明猶繞碧窗虛。心懸塞外三更夢、恨絕天涯一紙書。我亦久懷芳徑好、征鞍何日賦歸歟。

寒梅

滿林風雪愈精神、獨抱冰姿占早春、憶得羅浮香夢冷、夜來誰念苦吟身。

鰲翁吟草

雲上行

先生字鰲波、鄉籍甘溪。明嘉靖丙午、公元一五四六年舉人、官歷懷集縣知縣。事略見咸豐縣志選舉表、詩章見溫汝能纂輯之粵東詩海卷二十六。

匡門弔古

宋室腥膻沸戰場、翠華漂泊幸炎荒。孤忠死國悲萍梗、萬乘隨潮溺葦航。俎豆只今祠太后、漁樵猶自憶天王。可憐收淚朝衣濕、落日悲風易慘傷。

與何粵橋計部戴東岡山人集肖元胡明府別墅

草元新柳倚雲栽、寂寂山齋鎖綠苔。饒有墻頭濁酒過、不嫌花外小車來。瑤琴遣興時三弄、蘭艇穿城日幾回。幸爾隔鄰無隙地、好懷都在此中開。

甘氏吟草

甘學

先生字于盤、號二泉、鄉籍甘村。明代高士、負才識以世道自任、落落不合於時、少年與湛若水、方獻夫、霍韜、何鰲兄弟諸名士、讀書西樵、一生抗志高吟以終。事略見咸豐縣志、詩章見溫汝能纂輯之粵東詩海卷十九。

歲暮宿錦岩偕鄧粵仁兄弟

雪夜三人心、抱膝梅花林。梅香不見影、山谷衡門深。賡歌李太白、寧怯嚴寒侵。豪氣凌斗杓、孤興干仞岑。舉聲叱山鬼、驚起眠枝禽。何如鄧二仲、與我雄一襟。此事幾千古、今作臥龍吟。明發各乃別、載陽復相尋。共期登大科、（峰名）再弄天風琴。

遊海珠寺

扶病強登江上臺、芙蓉玉鶴共徘徊。三千世界杯中見、九萬扶搖醉裏灰。前世蘇公眞佛祖、再來甘子野花魁。光陰遮莫憐萍水、竹院尋僧忘卻迴。

遊噴玉巖

息履巖頭再振衣、千秋回首憶同誰。水聲不似當年響、石壁猶存去日詩。野老掃苔驚客暮、山花催鳥報春遲。未知眞隱歸何處、斜照闌干半謝時。

送汪生出西樵

絕壁棲枝歌月明、此身原寄一毛輕。千年仙徑迷芳草、六月芙蓉有醉英。雲液馨香來院宇、水聲絃管出崢嶸。白頭莫問留題處、已有文章借長卿。

釣鯉臺

白雲幾來去、紫蘚伴青苔、魚竊釣不起、空餘古石臺。

鍾氏吟草

鍾呂

先生鄉籍龍江、明景泰年間歲貢。官歷瀘州同知。事略見咸豐縣志選舉表、詩章見溫汝能纂輯之粵東詩海卷十五。

秋日同諸子遊山園分賦得衣字

林麓深深隱翠微、山空靈籟響秋暉。行穿竹裏雲連蓋、坐倚松根露濕衣、迎客犬從花徑出、驚人鶴遶柳塘飛。醉來不覺幽情放、散步狂歌踏月歸。

入杭

何來佳麗壓姑蘇、極目江山入畫圖。三竺花籠新佛寺、六橋煙鎖舊皇都。舞翻翠袖多稱越、曲唱菱歌半是吳。若問風流何處最、酒船明月泛西湖。

柴門笑吟

鍾政

先生鄉籍事略待考、詩見溫汝能纂輯之粵東詩海卷十七。注「經歷」二字。

山居寄友人

柴門半掩薜蘿深、坐對青樽但笑吟。幽裏自然堪忘世、閒中何事可關心。秋高山館先聞雁、楓老人家欲動砧。惆悵知音隔城市、松風何處寄瑤琴。

碧天嘯草

鍾千

先生字君錫、鄉籍龍江。明正德丙子舉人、官歷瑞州同知、以事見忤當道、罷官而歸、家居四十年不履城市、卒年九十。事略見咸豐縣志選舉表、詩章見溫汝能纂輯之粵東詩海。

秋興

楓葉颼颼落枕邊、禪房寂寂夜堪憐。秋深萬里天南夢、久客頻年薊北船。隨世功名真自悞、出門姿態向誰妍。開樽漫洗窮途路、指點黃花嘯碧天。

羅氏吟草

羅良信

先生字惇卓、鄉籍大良、明萬歷壬午、公元一五八二年舉人。授定州學正、以身率士、多所造就、陞衛輝府司理、俗悍蠻、罹獄者多、良信悉心平反、無冤縱、七登薦舉、遷漳德同知。時有狼狽爲奸者、前官莫能窮治、良信誅其首惡、餘黨屏迹。又遇中貴虐欲薰赫、良信一秉禮義化之、其迹亦頓斂。又以田土多荒、俗少知書、到任即給民牛種農具、以勸耕紆。以六經諸子教士、設科啓迪。修城、建學社、葺文廟、心力交瘁、竟卒於官。祀學鄉賢祠。弟良策、萬曆戊子、公元一五八八年舉人、博學多聞、任封州教諭、講解不論賢愚、咸受教益、陞國子監助教、擢刑部主事、亦以廉能稱、並輝棠棣。列傳見咸豐縣志、詩章見溫汝能纂輯之粵東詩海卷三十八。

汴梁即事

臘月驅車過汴城、朔風吹雪雪縱橫。南陽未著蒲鞭化、西洛爭馳竹馬迎。錢穀甲兵稱瑣屑、祁寒暑雨總摠情。夜深重鎖論文院、漏響鴻聲入夢驚。

石渠洞詩

韋憲文

先生字純顯、一字洪初、鄉籍鷺洲。明嘉靖壬子、公元一五五二年舉人。初授泰和教諭、歷官馬湖同知、靖府長史。及告歸、閒常賦詩、忽自悟曰、此非安身正鵠也、於是研究理學、聞李見羅倡道洱海、因師事焉。歸闢石渠洞、與門人發明師說。是時臨川湯若士、高明區羅陽、歸善葉綱齋、南海霍勉齋、皆深相契悟、書札往來、悉相闡究。大約憲文之學派、自江門而參之餘姚以豐城爲宗云。事略見咸豐縣志、詩章見溫汝能纂輯之粵東詩海。

別舍弟純義

白髮別良苦、金盃酌莫遲。蜉蝣看世事、松柏問襟期。向子徐遊岳、柴桑待解龜。高秋桂花

發、萬里訊南枝。

襄陽雜詠

兩度襄陽策馬遲、道逢林叟問遺碑、深藏水底千年出、孰與羊公角淚時。

白雲洞宴集呈何子明

洞主何時開勝地、故人此日共清歌。石鑪縹緲香煙細、雲磴紆迴玉溜多。鹿洞風花瞻具美、蘭亭觴詠問如何。嗟余未盡窮源意、空嘆年華一擲梭。

紫霄圃吟草

務光子

道人俗姓羅名寶珍、鄉籍大良。生有異質、恬淡、脫略世網、善詩精彈琴、尤精於理數之學。既長、娶妻生子、忽出遊武夷、異人授以導引之術、歸而棄家、修煉於元真觀之紫霄圃、後失所在、計其年已有一百五十又六矣。生前曾自製一琴、攜之遊於閩省、居一寺、謂寺僧曰、遺下此琴、請他日還我孫、僧以爲戲言、留爲空門之寶。越二百年、其遠孫羅黼、於明弘治年間、歷守興化泉、其子偶過廢寺、見琴問之、僧述其故、遂取以歸。列傳見咸豐縣志道家篇、附有按紫霄圃仙跡、傳自趙宋時代鼎湖開山云。詩一章見溫汝能纂輯之粵東詩海卷一百。

梯雲軒

自分清時懶著鞭、梯雲山下一窩便、幾回讀罷床頭易、抱得山雲枕上眠。

棲壑和尚詩

釋道邱

釋字離際、一字棲壑、俗家龍山柯氏之子、母陳夢老僧借宿而娠、釋生時室有異光、少即志願出家、侍憨山大師於寶林寺受戒。（按憨山即晚明高僧德清、天啓初年圓寂於曹溪）旋行跡遍吳越、廣求法門、一日參惠能六祖於新州道中、望鼎湖山水秀麗、策杖而入、遂在此開山、復得施主梁君少川爲設招提其中、共結淨社之緣。奉棲壑爲住持、募化有得、乃建涅槃臺、慶雲禪院其中、遂成大利、開宗鼎湖。至今三百餘年、事略見五山志林、詩章見鄒崖逋者鈔讀之嶺南詩存。又見溫汝能纂輯之粵東詩海卷九十八。

遊鼎湖

萬緣難放下、放下即僧身。綠竹爲良伴、青山是故人。但教能自重、何處不歸真。莫問滄桑事、桃花亦笑秦。

遊浴龍池

探幽窮澗底、盡處瀉寒流。梯磴尋奇絕、捫蘿上石樓。山花香異採、野果棘難求。雨過侵衣濕、還山日未休。

西窗遺稿

釋今嚴

釋今嚴、俗家爲大良羅氏子、原名殿式、字君爽。隸邑諸生、明末從天然禪師求請生死大事、至永曆三年己丑、清順治六年、公元一六四九年、乃剃度出家、居雷峰丈室嘗閱大藏、後於五乳峰靜室蛻化。釋道念甚深、知解明敏、於詩學亦爲世所傳誦、有西窗遺稿一卷流傳。列傳見咸豐縣志、詩章見鄒崖逋者鈔讀之嶺南詩存、此書則刊曰釋今儼。

南昌訪徐處士

南州高士後、孤隱石門閒。兩載期相見、方春始下山。文章顏謝侶、風致應劉間。未得看中論、跼蹐空往還。

今印詩存

釋今印

釋原名瓊、字佩之、一字海發、俗家梁氏之子、鄉籍逢簡。相傳在明末永曆二年戊子、一六四八年出家。少與吳煒、梁佩蘭友善、雖貧嗜學、考試補庠生。及母死過哀、吐血垂絕而甦、自是銳意修行、登匡廬、皈依天老上人、受具足戒、嘗隨師往返粵海廬山之間、承傳衣鉢、以至圓寂、亦有明一代詩僧。列傳見咸豐縣志、詩章見鄒崖逋者鈔讀嶺南詩存。

送劉長孺

霍山山下是蓬廬、半課耕耘半讀書。彭澤還存三徑菊、華陽歸去一巾車。落帆鷗鷺迎新侶、入里兒童指舊居。池上故交零亂後、他時魂夢亦應疏。

清溪言志

黃相華年方九十六



詩集	作者姓名	頁次	詩集	作者姓名	頁次
五百四峰堂詩鈔	黎簡	一三二—一四三	雙菴詩稿	梁善長	一五四—一五五
鐵菴詩存	黎兆棠	一四四	景鄴堂詩稿	梁濟川	一五五
靜香閣詩存	黎春熙	一四四	鳳公詩存	梁儀	一五五
荷香吟草	黎家裕	一四五	若農詩存	李文田	一五六—一五八
冷香集	黎偉光	一四五	天山草堂集	李文燦	一五九
萱階詩章	黎常琳	一四六	柯山草堂	李德林弟德炳	一五九—一六一
意堂詩鈔	黎壩	一四六—一四七	鳳岡集	李殿苞	一六一
花南溪館詩鈔	黎應祺	一四七—一四八	李郎吟稿	李大作	一六一
景陶庵集	黎豫章	一四八	吟香閣詩	李慕周	一六二
斗南詩存	梁耀樞	一四九—一五〇	郊行吟	李青山	一六二
樞蠟道人詩存	梁泉	一五一	香留吟草	李夢蘭	一六二
循陽草詩	梁翰	一五一	瘦暉山房詩鈔	羅天尺	一六三—一六五
藥房集	梁麟生	一五二	賁園詩稿	羅天俊	一六五
仁山吟草	梁麟	一五二	萬翁詩稿	羅沃槐	一六五
鏡湖雜詠	梁喬漢	一五二	偶然齋集	羅甯默	一六六
寒木齋詩	梁梅	一五三	集義軒詩	羅敦衍	一六七
兼澤近草	梁節臨	一五四	石湖吟草	羅孫耀子世舉	一六七—一六八
鐵橋道人詩	梁嶠	一五四	羅氏吟草	羅慶榮	一六八
采山詩存	梁澤	一五四	瘦菴詩集	羅敦勳	一六九—一七三

三山移學詩淺說	羅敷菴	一七四—一八一	青年吟	黃懷	二〇三
勺菴詩集	羅濂	一八二—一八四	筆山堂詩	蘇珥	二〇四
磬齋吟草	羅正國	一八五	柳塘吟館題畫詩	蘇六朋	二〇五—二〇六
石林存稿	葉志學	一八五	長春題畫詩	蘇仁山	二〇七—二〇八
逃虛閣詩鈔	張錦芳	一八六—一九〇	宮教集古近體詩	蘇若瑚	二〇九—二一三
少游詩存	張錦麟	一九一	冬心室詩存	蘇寶盃	二一四—二一六
荔生題詠	張思植	一九二	省齋遺稿	蘇昭南	二一七
荷香館題詠	張如芝	一九二	南翁詩稿	蘇夢麟	二一七
玉峰詩鈔	張琳	一九三	相以居集	蘇士許	二一八
純軒詩存	張臣	一九四	俟園詩鈔	蘇逢聖	二一八
磬池詩草	張嘉猷	一九五	友石山房詩集	蘇應庚	二一九
禹圖詩草	張洛書	一九五	北遊草	高士釗	二一九
雲巢詩存	張青選	一九六	勒竹齋集	仇池石	二二〇—二二二
吟秋館詩鈔	張思齊	一九六	府群玉嘯園詩稿	余象斗	二二三
鴻雪齋詩文鈔	黃丹書	一九七—一九九	水源木本稿	余映斗	二二三—二二四
安心竟齋詩集	黃玉衡	二〇〇—二〇一	語山堂詩	余錫純	二二四—二二五
戰古堂集	黃璞	二〇一	柱史閣初集	余雲祚	二二五
行旅吟	黃開銓	二〇二	閨怨存稿	余五娘	二二六
綠秀軒詩草	黃廉	二〇二	如蘭吟草	余大姑	二二六
捫虱堂集	黃蔭	二〇二—二〇三	水廩集	陳份	二二七

小鄭詩稿	陳同	二二七	陳氏詩存	陳官	二四〇—二四一
獨漉家聲	陳贛	二二八	碧玉小草	陳仲媯	二四一
東軒草詩	陳勵子世和	二二八—二二九	靜觀閣遺草	翁張憲	二四一
三瀧詩選	陳華封妻吳氏	二三〇—二三一	攜雪軒詩鈔	溫汝适	二四二
小禺詩草	陳次蕃	二三一	碧池詩鈔	溫聞源	二四三—二四四
與政同聲	陳應魁	二三二	自吟草	溫濟川	二四四
旅美詩選	陳祥和	二三三	醇齋詩鈔	溫士剛	二四五
味香詩稿	陳滉	二三四	濂渚詩鈔	溫丕謨	二四五
晚香堂詩稿	陳大興	二三五	半水詩草	溫伯玉	二四六
廣業精舍詩鈔	陳濟時	二三五	敏慎堂詩草	溫啓兼	二四六
蘭桂堂詩稿	陳佑成	二三五	自怡草	溫賢超	二四七
修此堂集	陳憲	二三六	退一步軒詩鈔	溫汝達	二四七
博堂集	陳經世	二三六	謙山詩鈔	溫汝能	二四八—二五一
鎔翁詩草	陳應掄	二三六	寄厓詩鈔	溫汝科	二五一—二五二
柔存堂遺草	陳氏	二三六—二三七	環翠山房詩鈔	溫汝驥	二五二—二五三
拙圃詩草	陳勤勝	二三八	靈淵詩鈔	溫汝驥	二五三
容山詩草	陳象仁	二三八	津寄齋詩鈔	溫汝進	二五四—二五五
太平洋即事詩	陳麗秋	二三八	竹堂詩鈔	溫汝遵	二五五
靜齋小稿	陳廣遜	二三九—二四〇	印可齋詩鈔	溫汝造	二五五—二五六
方外遊詩	陳文藻	二四〇	泛香齋詩集	溫承悌	二五七

溫氏家聲	溫子顯	二五七	春暉書屋詩集	何太青	二九四
孟亨詩稿	溫子頤	二五八	逸遊草	何琮璜	二九五
溫文節公集	溫肅	二五九—二六四	浣花堂集	何毅夫	二九五—二九六
菊叟畫餘	溫其球	二六五—二六六	葭洲詩草	何文宰	二九六
納楹書屋詩存	鄧華熙子本達	二六七—二六九	鄒崖詩集	何翹高	二九七—三〇三
老漁詩	鄧泰	二六九	鹽薇閣詩鈔	何程氏	三〇四—三〇五
實廬詩存	鄧秋枚	二七〇—二七一	景星照堂詩存	何國澧	三〇六—三〇八
小雅樓詩文集	鄧秋門	二七二—二七七	河清逸響	何國溥	三〇八—三〇九
補蠡山人詩存	鄧其鏞	二七八	環溪詩鈔	何松	三〇九
韶石詩存	鄧顯	二七八—二七九	布衣詩草	何琮芹	三〇九
梅花書屋詩稿	鄧彪	二七九	櫻花集	何恭第	三一〇—三一三
寄園吟稿	鄧瑞瓊	二七九	仲公遺稿	何仲輿	三一四
柳廬詩鈔	岑雯	二八〇—二八三	見星廬稿	林辛山	三一四
鶴禪集	岑光樾	二八四—二八七	五山草堂詩	龍令憲	三一五
讀書草堂詩	簡竹居	二八八—二八九	焦雨軒稿	龍唵香	三一五
沃心齋詩草	簡厥良	二九〇	天章閣詩鈔	龍應時	三一六
楚庭詩存	何邵	二九一	橘叟題畫詩	龍世權	三一六—三一七
飲虹閣詩鈔	何惠群	二九二—二九三	鹿野詩存	蔡如萃	三一八
蔗境山閣詩集	何棟	二九三	聽桐山館詩集	蔡錦泉	三一八—三一九
蘊玉書室詩	何碧嶼	二九三	杜若居稿	蔡蔭	三一九

十二芙蓉池館吟草伍學藻 三一九—三二〇 意園詩文集 歐功煥 三三〇

苗風百詠 伍頌圻 三二〇 無逸堂稿 歐陽達 三三〇

折柳吟 周隱琴 三二一 榕社吟稿 歐陽芬 三三〇

周氏吟稿 周其芬 三二一—三二二 石樵詩草 嚴倫 三三一

邊聲酬唱集 周兆璋 三二二 詩禪室稿 嚴顯 三三一

佛緣詩存 周果 三二三 不窺園集 嚴大昌 三三一—三三二

魚雁錄述音 周廷幹 三二三 拙咕集 曾文英 三三二

陳情吟 鄭際泰 三二四 香江雜詠 廖上科 三三二

冷澹齋稿 鄭天佐 三二四 蛻菴集 麥孟華 三三三—三三四

憶舊時稿 趙鳴玉 三二五 賜書樓詩 胡亦常 三三五—三三八

自鳴軒吟草 趙均 三二五 梅雪堂詩草 胡國柱 三三九

蓮社吟草 趙林臨 三二六 浮家吟稿 胡天寵 三三九

元翁吟草 趙元德 三二六 拙圃詩草 胡光前 三三九

湖聲吟稿 趙球 三二七 古草詩鈔 胡其砥 三四〇

譚堂詩鈔 林萼 三二七 蒼厓詩稿 胡廷鈞 三四一

盧郎詩稿 盧棻 三二七 一坡遺草 胡思 三四一

三郎吟稿 歐之麟 三二八 眠琴館詩鈔 胡斯醇 三四二

介翁詩 歐家廉 三二八 小雲吟草 胡雲姬 三四二

筠園集 歐正式 三二八—三二九 水亭即事 胡青娥 三四二

一鱗集 歐祖詒 三二九 色香俱古室詩鈔賴瀛 三四三

且樸軒詩鈔	賴孟瑜	三四三	根香圃詩集	馮球	三五五	稼堂存稿	楊一夔	三六五
達馨吟草	賴孝通	三四四	欣所遇齋詩集	馮來蕃	三五六	礪山詩草	楊邦	三六五
虛舟詩草	賴學海	三四四	棲雲山人詩草	馮肩	三五六	鵝陽草堂詩	楊子鈞	三六六
垂綸閣集	梅萬祉	三四五	倚魚山閣詩集	馮培光	三五六	秋航吟草	吳梯	三六六
精華錄詩	梅本裕	三四五	秋田詩稿	馮秉芸	三五七	今我齋詩集	吳維彰	三六七
梅榦翁詩	梅修	三四六	郊行吟草	馮卓英	三五七	顯翁吟稿	尤庚	三六八
艾納香齋詩稿	梅璿樞	三四七	醉吟遺稿	馮達昌	三五八	梅軒集	湯金英	三六八
自娛集	梅玉照	三四八	天籟之音	馮全	三五八	石洞遺草	釋元覺	三六九
草間蛩響	梅之品	三四八	寒衿吟存	朱氏	三五八	慧弓吟草	釋開詞	三六九
劬書軒詩鈔	梅夢雄	三四九	清白堂集	劉雲漢	三五九	羅浮詩稿	釋源子	三七〇
蒿園詩集	譚湘	三五〇	蝸寄山房詩草	劉靖	三五九	順治	一六四四	一六六一
攬芳園詩鈔	譚楷	三五〇	劉氏存稿	劉扶山	三六〇	康熙	一六六二	一七二二
霞菴詩稿	譚溢元	三五〇	白溪家訓	劉蘭雪	三六〇	雍正	一七二三	一七三五
左氏吟草	左金泉	三五二	雨湖吟草	劉潛蛟	三六〇	乾隆	一七三六	一七九五
省軒詩稿	左業先	三五二	季子吟稿	郭勳	三六一	嘉慶	一七九六	一八二〇
寄亭草	潘鳳昌	三五三	晚香圃吟稿	邱士超	三六二	道光	一八二一	一八五〇
九畹堂詩集	潘蘭皋	三五三	雲廬吟草	邱庭照	三六三	咸豐	一八五一	一八六一
潘氏題畫詩	潘元貞	三五四	綠窗庭課吟卷	邱掌珠	三六三	同治	一八六二	一八七四
菱湖邊屋詩	馬貞榆	三五四	雲林社吟稿	丁炳作	三六四	光緒	一八七五	一九〇八
晦岩詩稿	馮兆光	三五五	雨舟吟稿	康需	三六四	宣統	一九〇九	一九一一

順德黎 簡簡民撰

五百四峯堂

詩鈔

陳序璿題



校對無訛

廣州儒雅堂印行

同治甲戌仲秋
南海陳氏重栞

齋華子夜碧

乃問清鐘

勾吳孫爾準錄題

小影



二樵道人小景

五百四峰堂詩鈔

黎簡

先生字簡民、又字未裁、號二樵、鄉籍弼教。生於清乾隆丁卯、公元一七四七年、卒於清嘉慶己未、公元一七九九年。舉乾隆己酉拔貢、學問淹博、擅書法丹青、詩尤峻拔、與同邑張錦芳、黃丹書、番禺呂石帆、並稱嶺南四家。惜體弱多病、性又疏狂、乃有藥鼎老人與狂簡之自稱。平生喜徜徉於東樵羅浮有四百三十二峰之勝與南海西樵有七十二峰之勝、因乃號二樵道人、起居處稱五百四峰堂也。事略見烏洲蘇文擢編之黎簡先生年譜。

辛卯年入羚羊峽寄閩人

清江連白沙、秋畫如月色。蒼然暮帆影、涼風轉秋碧。舟行入青山、山青立天石。峽雨去卻來。山颺順還逆。哀狖遞雲屏、清切不可極。違峽已十里、隱耳淒不息。端州萬家夢、上有孤月白。是時水村夜、佑復當窗織。星露江上草、草根蟲唧唧。唧唧復唧唧、吾聞汝歎息。歎息不能夢。

邕州

岬岬荒城畫角哀、滔滔急水白沙頽。不勝今昔親垂老、如此風煙我再來。幾箇遊人非斷梗、是何名岳入邊垓。故鄉倘有羅浮月、可許幽輝滿鏡臺。

送別歲壬申

草長蕩春愁、春江水急流。桃花兩岸雨、天末一歸舟。同日遠爲客、當筵難再留。崑崙他夜月、相望各回頭。

癸巳閏上巳

還逐前期客、新流接舊觴。忽驚別已久、坐厭歲何長。天有一餘積、人增百事忙。春風卅日過、回首亦茫茫。

甲午秋望

極天惟海水、水上白雲飛。雲淨見山色、山寒宜夕暉。徘徊晚禽影、映帶遠人歸。不盡滄溟意、仙舟與我違。

乙未二月二十九日題

東風留得幾分寒、散入江鄉山水間。柳絮學飛才點水、木棉落盡好看山。舞隨蛺蝶嬌孩轉、行帶蜻蜓病婦閑。二十九年回首了、一般春日去闌珊。

空村

空村收稻了、杯酒勞吾勤。暇日無知友、相思生暮雲。隔花人共語、招手鳥成群。獨醉吾廬下、無機物亦欣。

丁酉八月寄張葯房錦芳

入春八日劇無事、便欲寄詩慵未題。定憶南樵李居士、梅花晴雪到江西。

又與黃虛舟丹書

兩年一月作離群、殘臘初春再訪君。風壯城飛萬松雨、晝寒簷落五山雲。已成鷗鷺頻來往、欲以丹青佐見聞。愛爾雅言無孟浪、不言時亦溢幽芬。

戊戌寄仇巨川匯洲

妙絕賢東主、西樓在竹西。露螢花院照、風浪柳簷齊。天氣三分月、詩心萬仞磯。何人還勸駕、官札動幽棲。

己亥寒夜憶亡妹邕州

孤墳在天末、骨冷汝何知。有子辭多日、爲人好幾時。聰明應自悟、魂夢及吾疑。曩夜平生見、蒼茫無一詞。

沖虛觀至朱明洞并記

仙人已去山水在茲興至慨深信疑交立自沖虛觀入朱明洞地深天高石危人小萬樹負勢泉灑中林蓋太古以來日色未展也力壓藤葛迺至於此見其巨石橫下上有古屋於是登之言通小有之天未縫仇池之穴斯則遐想神蹤徒存靈構者耳登臨既倦勝賞彌欣既丹竈之可窺何羽化之莫繼山中古泉若可汲引松梢白雲與人去留

吾翁慕真侶、全家多道氣。賣藥蜀楚間、求書吳越地。寄書還赤明、遂欲闢靈異。高蹈攜子孫、啓讀瓊笈秘。葛令爾何人、胡必同其世。小子獨往願、亦有偕隱志。山妻伯鸞女、自結青荷帶。勸築五畝宅、多供數畦菜。不知麻姑田、何時入官稅。

白鶴觀登五龍潭上玉女峰

遵水出觀側、攀石上亭腳。坐疑潛龍怒、水勢憤逆落。空潭貯元雲、深光入青嶽。山半偪取徑、古篆壁對削。橫行跨潭顛、長橋臥大壑。日色耀積鐵、俯視眼火鑠。行經一橋盡、仰觀孤峰弱。娟娟杳離立、娜娜態欲卻。登步緣右袂、息憩臨髻角。始驚飛雲高、猶似地下度。已見東逝川、一綿裊空廓。

增城縣渡江中道至資福寺

涉江蹇中洲、迴睽城頭山。落日白沙闊、送行人已還。登麓亟趁途、僕夫隨後喧。西嶺阻晨景、迺云日過殘。矯足陵危厓、枉步阻岐瀾。松枝俯掠地、石容奮干天。望林意思止、聞鐘飢欲餐。山僧不識人、杖藤來啓關。夜久山風多、靜對無復言。

夜入粵山問郭山人病

支床南郭仍聞籟、抱病東陵舊種瓜。徑曲爲依三畝水、燈光猶隔數層花。千年法物陳良藥、四月春衣去典家。緣題酒醒休料理、相過需酒爲君賒。

庚子生日

吾年三十四、半度客中春。倍得向來日、便爲中壽人。含情邈今古、受命足風塵。歌詠江聲裏、悠悠自苦辛。

七月之日得家君子示

八口歸來路幾千、長途何地好林泉。滄江雨色雲低處、白髮天涯日暮船。殘卷似焦桐尾火、

余家藏書於邕州被火毀孤墳留哭象山鵑。謂亡妹也杜陵詩是吾家事、工墨頻儲本分錢。

辛丑秋風

秋風吹白蘋、江上獨離群。珠女水爲鏡、花船波漾雲。南來月自潤、夜警鶴虛聞。莫復當窗織、衣涼露氣紛。

歸里

半載長長去、今朝草草歸。入門剛晚食、開篋換秋衣。穉女解言笑、病妻猶上機。殘年守和樂、難得共寒饑。

壬寅病可以硯謝何徵君

儒生苦心腸、此物能致病。昔時走山川、此物若爲命。始終實勞我、暴殄何究竟。以身與之較、動靜安可競。我則譬爲墨、以媚石之性。寧知石愈好、於墨愈無贖。過春八十日、日日刻吟詠。鶯花本何機、而我陷其穽。石也應哂我、筆舌無乃佞。勉力事藥鑛、又恐減炊甑。遣之近侍君、氣旺君轉勝。黠奴得其主、一一坐呼應。異時我疾作、飲子煩重訂。石乎與爲功、於石亦殊幸。芳橘必南園、生物自有定。銘言久勿剗、礪礪余獨行。

癸卯元夕

今年今夕月、始見即團圓。雲散輕含水、花多暖破煙。香絲繚鬢影、酒力懦琴絃。但是無風

雨、春情百可憐。

婦請以八分書心經係以十二韻

汝根本靜慧、而性善悲傷。近日梵修苦、此經金色光。生機諳死趣、疲葯切焚香。繞屋曇花白、雕檀佛面黃。奉持惟一往、壽命莫偏長。居士非新戒、家人祇俗裝。流連仍愛水、慘淡倚空王。裙布梁鴻女、儒風法喜郎。分書無上咒、合掌四知堂。卿受多心懺、斯爲卻病方。他生天鼠婦、前世雪衣娘。爲我將詩獻、如來不笑狂。

述哀一百韻

甲辰四月廿一日妻梁氏死矣向來護病繼以傷心未嘗有詩至今七月六日感神仙夫婦之說乃飲泣勉述此篇情至無文不知所云而已

青龍在甲辰、夏四月廿一。買藥方入門、飯熟不暇喫。大女泣屋隅、小女啼繞膝。老親堂上歎、相對視白髮。下呼廚中婢、掩面向曲突。仰首觀皇天、天陰雨霏拂。病婦呼就幃、握手與郎別。自從數月來、心緒無臆說。目前即長路、安忍無一訣。頻頻呼郎者、非是故瑣屑。自顧無幾時、中情甚飢渴。君今撫我體、四肢已殭厥。凜若置大水、惟餘此心熱。頃刻不相語、誠恐冰到舌。天生薄命妾、姓梁名曰雪。固當畏炎威、值此長夏節。生息雖漓薄、安敢昧清潔。憶從嫁郎始、恩愛膠投漆。出入君懷中、自憐可憐絕。微軀本多病、葳苒借年月。自危情累人、因以身許佛。拜賜禪病圖、覽鏡入毫末。中閨課齋期、幽心事經帙。自謂留此身、非敢取容悅。幸依君子傍、永得奉巾櫛。漸知金經理、生死本一轍。自無諸惡緣、地獄何罪孽。轉識安樂死、勝茲疴厄活。但感君故情、千秋亦難割。君昔萬里行、三載孤影子。及乎遠遊歸、風波未嘗歇。妾爲雙輪轉、君爲長繩掣。牽綫十八年、今日合當輟。翁姑老年人、反見妾淹沒。年衰不勝哀、哀時易成疾。上堂娛色笑、無以妾故奪。他人亦知孝、行當

入吾室。兩女遺累君、是郎之骨血。女笑妾則笑、女瘦妾露骨。妾死女有母、女嫁妾則畢。妾有好男兒、聰明第三姪。可惜隔千里、母子在兩粵。婦請於家君以兄第三子生人不識鬼、音影無可察。及其長大時、知此義難闕。始與觀病圖、使彼思彷彿。不然少時見、習覩成故物。此婢無容色、亦可十應七。是妾手爪餘、一日斷一匹。買之五六年、漸得病體逸。留之事新人、或不致嫌嫉。知郎爲妾重、憂牢固難掇。不孝罪無後、旋應擇良吉。勉力爲姻昏、爲郎解沈鬱。妾復有所請、君恕無禮律。若在平昔時、此事未易達。可憐縱扶起、膝強痛難屈。妾聞世人語、君乃燕許筆。有福死夫前、此語俗不忽。況妾前世因、幸與郎固結。自思初作人、未曾離閨闈。中間何言行、自愧說不出。又言婦人者、無事乃其質。況有賢丈夫、和聲滿琴瑟。但於凡百人、善惡有名實。婦人不自眩、自眩義已失。郎工書八分、文章自超迭。後日此抔土、煩君一方碣。千年百年後、有人臨我穴。椎碑驚我寢、亦受人拜謁。豹死留其皮、妾目亦已閉。至云岐軒理、固非藥餌缺。眼看郎玉體、爲妾瘦兀兀。盤渦沈巨舟、有力不可拔。妾自魂魄弱、莫葬山嶽業。山頭多故鬼、新鬼畏迫軋。塋墳就近郊、莫使水沁洩。但須高數尺、俾妾望門闕。松柏三兩株、桐竹交相列。碧草魂往來、亦得蔭修密。魂寒就郎衣、魂飢就郎啜。縱無身口累、亦不相間闊。今世且中逝、他生焉可必。倘化爲輕塵、願得上郎襪。倘化爲罔兩、就郎影邊滅。願爲中山兔、與郎作柔札。慎無犯教言、復不畏剛折。轟轟萬古名、妾亦倚擔揭。今爲秀才婦、雖未縻祿秩。異時營齋葬、恩義到泉窟。歸來定何年、今日是何日。記取死別時、風雨冥路滑。哀哉復哀哉、齒緊妾言訖。爾時尚握腕、冰氣透我徹。不知坐予處、安計擊之脫。家人拉我去、心死一寸鐵。不知兩穉女、呼娘叩頭裂。我欲竟此曲、此曲不可闕。我欲通乎命、吾不若是愬、死生日已遠、屈指七旬越。傷哉半生內、茲哀幾時述。

乙巳七月七日往端州赴袁升父之招
河漢自新秋、天人異別愁。兒啼無母夜、親夢有方遊。山切雲端月、帆吹樹底舟。故人書昨至、兩番慰駸牛。

佛山丁未秋杪絕句六首錄二

萬瓦低迷暗月明、古牆燈碧乍寒生、不知海外風雲色、已入街西木葉聲。
老樹西風送淺寒、風廊雲篆蘚痕漣、鶴樵山勢營邱樹、畫本天真面壁看。

己酉龍眼詩

年年園果誤歸人、龍眼初黃顆顆勻、此別扳枝出手遠、六年時薦飮盤新。辭鄉荔紫梅黃後、去歲秋分白露旬。是日歸舟挈雞犬、過時嘉樹感風塵。

辛亥暮春睡起漫成寄門人何深

鳥聲花片襲低風、珠溜簷端雪颺空。夢覺坐忘仍蛺蝶、雲浮淵審愧虬鴻。功名俯仰成塵跡、吟望低垂得病翁。己判湖山與宗炳、悔將詞賦老揚雄。

連日寒雨東鄉曲諸公

壬子上元以來與諸公閒日會飲多雨阻不齊

柳絲浥浥夢醺醺、夢雨橫江草綠雲。隔日酒杯欣取善、一村花絮攪離群。苔高粉壁蒼山勢、樹入春潮碧水紋。二月上旬初月破、可須修楔感斯文。

寄翁少宗伯方剛

公嘗一使九年歸、歸廿年更拔士期。不見二樵圓夙夢、見懷詩有寄語二樵圓夙遠來雙鯉訪論詩。先生將刻所著杜詩附記而欲徵及鄙論斯文要得天地壯、此事誠非龜策知。也喜將心寄北斗、不然翁舌似南箕。

癸丑病起得侯貞友二月廿四書索作畫寫成寄之並呈馬稷甫

去春送君歸、幾月山水程。今春金陵山、始入君眼明。眼明忽南望、南盡天碧晴。其下木棉花、上爲霞氣楨。遙知老狂簡、獨處衆香亭。煙艇發雲渚、紅衫遊碧城。懷人作書處、老屋

青溪清。

貞友書室名清溪老屋

秀色江南春、墨光潑深青。使君傷春心、作我悲秋聲。七月池荷老、漸

見白露零。病身畏夜氣、颯颯生衣輕。憶君歸半年、伐木感友朋。家食弄狗子、于門逢馬卿。馬卿倦南遊、北轍趨上京。京華士夫內、或問賤子名。吟我白絲行、取義竊杜陵。白絲白如雪、恐懼五色凌。以斯示貞友、吾得女子貞。馬君既還吳、進士不速成。則知二月時、無意千佛經。遠還惜賤子、秋色閑柴荆。茲聞萬餘里、迺能達爾聽。又更五千里、而以慰我情。寧知病維摩、此病得未曾。于徐混眠覺、耳目皆窈冥。得君罔明指、彈我時一醒。老馬忽慵候、顧影謬自矜。他時長途中、或登君子庭。先寄尺幅畫、幽絕出雲屏。按圖爲買山、待吾行腳僧。清淮美水石、濁酒呼弟兄。夢魂銘丹崖、飯食儲青精。虞泉照白髮、滇池求赤藤

自題夏山欲雨圖

山作層雲湧、雲爲大海平。虛堂浮雨氣、高枕入江聲。樵子師元化、湖光喻太清。幽靈空闊得、心目臥遊驚。

甲寅長至

時序已長至、病軀隨小康、寒門遙乞雨、典庫緩儲囊。老穉縈魂夢、鄉關有阻長。稍聞米價落、歡喜視蒼蒼。

羅浮陳道士別二十八年今約可百歲道流時或見之作詩遙贈而已

昔看羅浮雨、平吹滄海雲。誰知雨上月、獨照雲中君。老桂古壇墮、白猿青壁聞。舊逢惟落漠、今遠話幽芬。草草將歸路、纍纍直視墳。鶴聲知訪道、霞色想殘醺。我有南華注、師函

五岳文。他年瓊笈合、一榻石樓分。樽泛虛乘瓠、風生直運斤。無爲吾自試、先不亂鷗群。
桐心竹詩四首并序

竹之生貫乎桐之心有君子投契之象焉亦異矣然以平等觀之桐自空也竹自迸也如水之赴渠渠未成水亦東西南北流耳何異焉爲之詩歌以詠之略其異玩其象意者其有祥徵歟首爲道其來由中寓言爲問答而終以瞿曇無分別之旨蓋希風乎靖節形影問答而決於神釋云

石氏植桐竹、自媚幽人廬。桐老空其中、新竹傳舍居。異物而合體、巧入環中樞。不知造物者、何爲此拘拘。旣喻楔出楔、元以虛集虛。雍雍文鳳來、宜有覆翼雛。遂喜棲有託、不憂食無餘。西風昨夜至、落葉空前除。仰面不見月、月影仍扶疏。颼颼動秋陰、益見材爾殊。童子誤聽秋、謂聲在樓櫺。不老纖纖葉、附此亭亭株。

竹君語桐君、道者懷若谷。子今虛其心、我爲實其腹。與子其地同、附著異械樸。相親漸相摩、氣類成一族。人謂我無角、我竟穿爾屋。秋陽髡爾顛、我則衛爾足。嶢嶢百尺枝、何遽看爾禿。君免鼠墮戶、我似箭在箠。旣入出而陽、有與生使獨、古人重臭味、絲蘿且喬木。同心齊所願、霜天厲寒綠。

桐君謂竹君、與子膠漆交。相好毋相尤、物我均與胞。我固不可遷、子來不待招。我節今在外、如與子同袍。汝節今在內、使我精不搖。是非無成心、死生爲一條。不使內落籜、吾寧外早凋。汝榮不我衰、我木得爾標。同聲共腸胃、而成此調刁。庶乎樂出虛、勿類土實瓠。他時我爲琴、以子爲比簫。遑問絲不如、與子諧英韶。

一知在忘言、桐竹毋熒聽。一與言爲二、即非自然性。我無分別法、與爾安心竟。於以正彼生、由此生者正。兩體子母爲、銅山洛鍾應。孕如佛指腹、縛似僧入定。下有苔同岑、上有鳥共命。吾知名園主、寓物幽賞併。不類相爲類、何復有爭競。吉祥止所止、知止得殊勝。

地萌桐竹孫、穎脫冰玉映。此詩爲城西石懷瑜作也石氏園林有此異產爲徵題詠一時作者數千人余不獵兔詩社者幾三十年今偶一爲之遂拔其前矛因聊復存之

乙卯春光

春光屬早寒、雲暖亦開山。綠滿應蘋渚、青來已竹關。有情欣減病、無事幸成閒。不復隨裙屐、煙波獨往還。

衆香亭餞梅歌

空山無人置古琴、冷風七絃吹玉音。更誰知此靜者妙、而我窈見天之心。天心道心并詩心、歸日梅花初照林。土墻闕處白漠漠、酒盃天象青深深。老樵於此不飲醉、幙天席地一月睡。大光明出正法眼、極嚴厲通古和氣。炯然亦自見吾真、吾方喪我能語人。烏啼夢斷人間世、月地雲階天上春。迢遙明月別千里、送遠登山又臨水。陰寒風雨生莓苔、慘淡菁華寄桃李。

青蘿嶂下作寄梁徵士拱之黃博士虛舟

樹杪青石大、石上細廟古。廟門春江潮、帆陰送風雨。我獨不帆槳、信舟溯迴渚。山色朝抱煙、氣煖若炊釜。空碧高自寒、綠意到南浦。芳草春水波、離心眇何許。昔時與梁大、最少者黃五。紅樹繞三匝、炊煙白一縷。圖成遠如夢、樹老生益苦。故人亦非故、衰謝獨愁余。青山汝閱人、以爾爲逆旅。朝暮萬客來、今古惟爾主。

聞蘇大其詹以教諭用喜而有作并柬黃同年舟山黃五虛舟

憶同蘇大別江浦、靜者自言宜冷官。客夢尋鷗東海闊、臣心如水夕冰寒。雨舟博士風流甚、八座中丞禮謂朱石數寬。喜爾疎狂未階立、倘稱詞賦出雲端。

十二月廿六日別竹平安館還家園見竹外梅花有作

還家物已殘、我竹自平安。迴首春城暮、無人月砌看。此君矜道氣、主者亦儒酸。不有梅花在、先生太苦寒。

鐵菴詩存

黎兆棠

先生號召民、鄉籍昌教、清咸豐癸丑、公元一八五三年進士。官歷南安知府、臺灣兵備道、津海關道、授光祿寺卿。一度掌教羊城書院、創建玉山書院、捐款重修新會陳白沙先生釣臺、並撰立碑文以表儒行。生平自奉儉約、飲食衣服、不異寒素、無事手不釋卷、常自署鐵菴、光緒癸巳公元一八九三年無疾而終、壽六十有七。子國康、光緒己丑恩科舉人、國廉光緒癸巳恩科舉人。傳略見民國己巳縣志、詩章見南海余少飄編廣東歷代詩鈔。

賊困南安粵人傳余城陷殉節亦有言余棄城而逃者感賦二律寄劉定方兄

談何容易作忠臣、縱不修來也有因。事繫千秋論福澤、天留一命苦風塵。金戈鐵騎皆前夢、去馬來牛尚此身。他日戰場重遇敵、問將何語謝鄉人。

又

瓦全玉碎總茫茫、位置身名任取將。多少糊塗成富貴、何緣義烈到疏狂。愧無世溥生何益、轉有人傳死亦光。苦累鄉園老兄弟、瀟瀟聽雨夢沙場。

靜香閣詩存

黎春熙

女史字文綺、清咸豐進士黎兆棠女、適大良光緒副貢龍澤鈞爲室。少隨父宦遊各地、結縭後生子裕光、裕光六歲、春熙夫婦皆不幸早世。春熙能詠、遺著有靜香閣詩存、事略與詩見南海余少飄編之廣東歷代詩鈔。又見己巳版縣志藝文、并著鄉籍昌教。

賊圍南安夜雨江漲不得渡

黑雲浩浩捲雙旌、陵雨滂沱夜澤城。壯士疆場爭努力、家人生死早忘情。江翻雪浪喧鼙鼓、天倒銀河洗甲兵。報國愧無奇六出、木蘭奚用請長纓。

荷香吟草

黎家裕

先生字孝常、號荷亭、鄉籍待考、清康熙己卯、公元一六九九年舉人。見溫汝能纂輯之粵東詩海卷七十三。

遊樵

不到層巒久、乘春復上樵。路齊高樹頂、雲鎖隔山腰。鳥語臨煙壑、人歸度石橋。村翁曾舊識、雞黍晚相邀。

過慈元殿故址

此地曾傳舊帝宮、滄江何處隱真龍。已無潮信來三日、豈有山靈護九重。母子命窮千里浪、君臣恩盡一帆風。書生幾點艱難淚、洒向淒涼逝水東。

冷香集

黎偉光

先生字樸園、鄉籍槎涌、清雍正癸卯、公元一七二三年舉人、官歷揭陽司鐸、四川射洪縣知縣、遺著有燕遊草、蜀中吟、冷香前集、冷香後集。事略見咸豐縣志、詩章見溫汝能纂輯之粵東詩海卷七十六。

讀虞部集有懷歐楨伯

赤水遺坊在、哀然大雅堂。才高七子步、化被廣陵疆。揆藻霞成錦、提躬劍有霜。南園新俎豆、先後仰齊芳。

姑蘇

乘潮一棹闔閩城、草綠王孫萬里情、好是虎邱饒勝跡、日斜沽酒試尊羹。

前題之二

麋鹿郊行輦道湮、刻憐香水尚留春、山塘半月忘歸棹、爲有當壚會醉人。

萱階詩章

黎常琳

先生字翰伯、鄉籍龍山大陳涌、清代貢生、著有萱階詩章、事略與詩見龍山詩錄卷上。

舟泊海珠謁宋學士李忠簡祠

宋代衣冠仰海濱、生平大節在君親。墓廬矢孝堪言子、御殿書名不愧臣。天上有星旋北斗、朝中無黨識南人。停舟舊是行吟地、雲水相深絕少鄰。

羅浮探梅有懷張實齋

雪滿寒林月滿山、羅浮花候客躋攀。春風破曉頻醒夢、村酒餘香復醉顏。天下名峰如此少、古來俗吏幾人閒。廣平堂畔南枝放、不見襄陽海外還。

意堂詩鈔

黎壩

先生字士璋、鄉籍龍山大陳涌、清代諸生、著有意堂詩鈔、事略與詩見龍山詩錄卷上。

贈何介軒八分書歌

何公八分久擅長、綾藤大小隨圓方。興酣洒墨竟一斗、下筆志欲無中郎。我生酷愛書、能事未曾畢。今見公書瑰且奇、臨摹恨少如椽筆。聞公昔年遊楚都、湘娥憑弔頻招呼。開樽黃鶴恣鯨吸、雲夢八九吞如無。因之更鼓西湖棹、六橋遺跡遍吟眺。長短高歌韻乍成、蘇隄楊柳明殘照。於今六十始倦遊、江山奇氣筆底留。諦觀魚鳥紛頡頏、近代以來誠寡儔。有明天啓間、孟津推王鐸。鄭簠起上元、古意復磅礴。吾鄉獨漉亦名家、結構不苟非穿鑿。公今筆法天縱奇、並驅前哲爭疾遲。淋漓墨汁衆錯愕、漏痕釵股無不宜。嗟余萍梗悲行路、兩粵風煙未停步。何日汗漫從君更執鞭、樽前細論重雲與游霧。

別從兄縉璋

豈謂儒冠誤、翻然事遠遊。聊窮千里目、或遂平生謀。風雨登樓日、關山憶別秋。肯令忘負

米、歲月漫淹留。

客舍除夕

歲序韶華不暫留、光陰過眼盡悠悠。可堪萍梗嗟行役、況復江湖動旅愁。雨歇南山欣縱目、聲沉北雁怯登樓。最憐弱柳春歸早、幾日垂青遍陌頭。

花南溪館詩鈔

黎應祺

先生字錫遐、鄉籍龍山排涌、清代貢生、著有花南溪館詩鈔、事略與詩章見龍山詩錄下卷

感舊

金石論交馮野王、詩瓢酒盞卅年長、南村風雁今誰繼、唧唧蟲聲話草堂。(馮晦岩)
未能白首賦同歸、老眼看人淚暗揮、豈到窮張窮到死、流風餘韻賞音稀。(張磬池)
青箱家世本南村、今日傳聞未忍言、一代風裁黃叔度、愛人忘記愛兒孫。(黃禹岩)
賣文無計養衰親、餓死荷塘累故人、我欲反唇罵劉四、多生饒舌合詩貧。(劉與樵)
少年掇得美科名、和靖高風見性情、一卷新詩廣陵散、夜涼鬼氣逼燈檠。(林保丹)
太冲能賦亦憐才、荆棘門前費剪裁、老愛神仙學遊戲、市中徐福誑人來。(左覺亭)
詼諧放曠笑髯蘇、牢落江南未剖符、多病子雲今縱酒、招魂還到草堂無。(蘇熊上)
燈窗三載共書廚、一別京華萬里途、舊夢南柯愁艷說、蕭蕭門巷蔡君謨。(蔡湘生)
頭銜仙吏又儒林、廿載倪迂詩苦吟、莫怪雲山懶書札、貧時朋輩總關心。(倪秋槎)
素車慚未哭陳平、力學空成進士名、病倚孤燈贈詩句、失群羊的是商聲。(陳小鄭)
飛卿誰信是無兒、款款深情教我詩、今日騷壇想風雅、孝廉船已別多時。(溫杯壺)
年時珠海少遊仙、細雨輕舟共醉眠、惆悵晚村才絕世、也同書畫化雲煙。(呂荔帷)
我生屠狗亦知音、心事周郎賞識深、昨到鰲山值重九、笛聲哀怨日西沉。(周樂亭)

書註深山不記年、怪名一任俗人傳、相憐入世同予病、性肯爲方不肯圓。（邱與凡）
老葉詩文本性情、品題難乞巨公評、傳人豈少孤寒士、憐爾蓬蒿沒姓名。（葉民首）
亦是詩人亦畫師、小馮才調不求知、晚年性喜長生訣、贈我羅浮五色芝。（馮尖山）
十上書終說不行、白頭無計作諸生、涓涓金竹山邊水、淒咽當年夜讀聲。（周家翼）
註就茶經老草萊、逢人都與說詩來、風騷合祖李長吉、花樣新鮮有鬼才。（李茶隱）

景陶庵集

黎豫章

先生字寶書、鄉籍大陳涌、清宣統己酉、公元一九零九年拔貢、官歷江西知縣、著有景陶庵讀史錄景陶庵文集、事略見民國己巳版縣志、詩章見乙亥溫肅輯錄之龍山詩錄卷下。

南宋四詠之文信國衣帶

自拌忠肝報紫宸、風流重感舊書紳。干戈落落家先破、志節硜硜石不磷。投筆難扶南宋社、質襟無負五坡身。裳冠未許腥羶玷、留取丹心照後人。

前題之謝疊山卜硯

廿載推占宋社墟、建陽市上幾躊躇。生涯鸚眼君休問、身世鴻毛我不如。戰罷軍容悲有墨、流離餓骨復磨渠。高風詎減西山石、猶草當年卻聘書。

前題之謝皋羽如意

雲暗風蕭日色過、孤臣有恨悵如何。握君到處揮千騎、爲國捐生痛五坡。折節荒臺公獨苦、傷心故宋淚偏多。興亡似解悲頑石、猶自硜硜矢枕戈。

前題之鄭所南鐵函

珍重緘封碧井沈、數篇遺稿自銘心。吳中有淚悲家國、水底無波質影衾。一片孤忠金自鑄、千秋公論劫難侵。皮裏幾人操筆削、禦寒誰似菊花吟。

斗南詩存

梁燿樞

公號斗南、晚號叔簡、鄉籍光華。生於清道光十三年癸巳、公元一八三三年、身岸異、眉目長秀、弱冠失怙恃。賴長兄介眉扶持教育、從南海朱九江先生門下游、砥行力學、領同治元年壬戌、公元一八六二年舉人、同治十年辛未、公元一八七一年登進士、第殿試一甲第一名、遂魁多士、爲我順德立縣有史以來之第二位文狀元、亦清代嶺南自番禺莊有恭、高州林召棠大魁天下後、至是鼎足而三。官歷翰林院編修、順天鄉試同考、湖北學政、入直南書房、充日講起居注官、翰林院侍讀學士、詹事府少詹事、以夙興夜寐、積勞遭疾、乃於光緒十四年戊子、公元一八八八年卒於山東學政任內行轅、壽五十有六。公一生抱明體達用之旨、篤孝友恭之道、及受都人稱爲金玉君子、故事長兄介眉若父、與兄與弟並顯科場。四兄燿藜舉同治甲子舉人、六弟燿宸舉光緒乙亥舉人。子三人、世經世絃同名列諸生、世綸光緒二十三年丁酉優貢。列傳見民國己巳縣志、事略見朱九江先生之一百七十年生朝行誼輯述之薪傳。詩作多散佚、公元一九九五年七月十五日、僅得自北京孔子學會陳獅先生見寄、鈔自故宮儲秀宮壁間所刻、有當年爲慈禧太后五十壽辰所寫之：

應制詩

懸圃清虛乍過秋、看山尋水上茲樓。輕鷗拍水春知暖、紅葉經霜晚更稠。風卷微雲分遠岫、浪搖晴日照中洲。躋攀況有承華客、如在南皮奉勝遊。

「詩、可以興。

可以觀。

可以群。

可以怨。『見《論語陽貨篇》』

何曼庵叢書弟六種

朱考亭半日靜坐

佐卿一兄大人

歐陽修方夜讀書

梁耀樞

梁耀樞七言行書聯

耀樞。字斗南。順德人。同治辛未狀元。九江弟子。其弟華一。九江壻也。樞樞以宮
詹官於朝。雖無赫赫功業。然時有封章奏聞。梁鼎芬有詩美之。工書。此聯尤雅逸有
緻。

樞蠟道人詩存

梁 泉

先生字崇簡、又字佩韋、鄉籍倫敦。清乾隆三十六年辛卯、公元一七七一年、北上、舉恩榜第五名。平生治學嚴謹、從游者衆、當主講連州書院時、聞者恒千里負笈踵至、舍不能盡容。其教人務主博通、不拘一格、爲世推重、遺著有讀史偶評、周易集証及古今體詩駢散文盈篋。晚號樞蠟道人、卒後、嘉慶癸酉、國史館徵取其遺書。列傳見咸豐縣志、詩章見鄒崖逋者鈔讀之嶺南詩存。又見番禺凌揚藻評輯之嶺海詩鈔卷十。

游鼎湖憩半山亭

髀肉閒生久、長途笑未經。浪言千里足、同憩半山亭。下視失群物、遙連挹衆青。從來凌絕頂、筋力會須停。

曠觀臺秋眺

層臺四面俯林巒、曲曲池塘邊小欄、木落臺依滿地出、霜空人坐一天寬。江城似練包香國、海水含珠射玉盤。秋色仿同吟意遠、名園矯首樂遐觀。

循陽草詩

梁 翰

先生字遇屏、又字少周、號戢菴、鄉籍麥村。清乾隆戊辰公元一七四八年進士、官歷福建羅源縣知縣、邵武府同知、以病歸、卒年六十四。遺著有循陽前草、後草、旅燕草、宦遊草、教養紀實等傳世。事略見咸豐癸丑版縣志、詩章見順德博物館藏順德歷代士林書畫專集所載。

自題墨竹

蠻觸何須辨糾紛、夙期瀟灑自空群、誰能拋得紅塵淨、高潔還應讓此君。

藥房集

梁麟生

先生字靈長、鄉籍大良、清乾隆初與同邑余錫純、羅天尺、陳份、嚴大昌時爲文酒之會、號鳳城五子、遺著有藥房集。詩章見鄒崖逋者鈔讀之嶺南詩存。

羚羊峽

橫截牂牁斷、江光一線來。峰巒浮地起、門戶自天開。日影暗當午、波聲晴伏雷。客心與衰葉、聊被夕陽催。

仁山吟草

梁麟

先生字仁山、鄉籍大良、清道光時人。善畫山水、花卉、事略詩一首、見順德博物館藏順德歷代士林書畫專集。

自題歸田圖

白髮思家萬里回、小軒臨水爲花開、故應剩作詩千首、知是多情得得來。

鏡湖雜詠

梁喬漢

先生字斗衡、鄉籍待考。按南海余少飄編廣東歷代詩鈔卷五、謂從番禺汪孝博片羽所得、爲我邑清代茂才、光緒庚子、旅食澳門、作有鏡湖雜詠絕句、風土雜詠絕句、香港雜事雜感及港澳旅遊草等、惟皆未得見云云。

登西望洋山頂二首

眼界凌空闊、嚴疆一覽全。危樓疑縮地、遠水欲浮天。警備群峰應、防周衆戍聯。令人增壯志、立馬勒燕然。

望古心遙集、開荒溯勝朝。通商從昔睦、據險至今驕。風氣趨洋薄、邊聲近海饒。愧無柔遠略、臨眺鬢蕭蕭。

寒木齋詩

梁梅

先生號子春、鄉籍大塾、清道光八年戊子、公元一八二八年優貢。家藏漢瓦、宋甌、宋畫及宋、元、明、歷朝善本書籍甚豐、以朝夕摩挲至忘寢食、其詩文作品雖曾一度受粵督阮元開學海堂時、見而擊節稱賞、但終以生涯潦倒、卒時年僅五十有一、遺著有寒木齋詩二卷。列傳見民國己巳縣志、詩章見鄒崖逋者鈔讀之嶺南詩存。

岳州

天下行已半、客遊殊未還。停舟岳陽郭、遙見洞庭山。岸樹閱人老、沙鷗如我閒。離騷攜一卷、讀向水雲間。

短鬢

短鬢日加白、寸心依舊雄。詩吟黃鶴子、劍慕白猿公。書卷還身外、關河又夢中。平生恩未報、得不問窮通。

廣利

羚羊峽口好村墟、無數人家傍水居、一帶紅棉碧嶂路、江干雙槳賣嘉魚。

蓮鬚閣黃牡丹詩事歌節錄

名園花宴聯詩友、健筆何人奪魁首。文壇巨帥古曾稱、香國掄元世稀有。狀元家近琵琶洲、劍膽琴心事壯遊。黃童本是無雙士、溫嶠群推第一流。騎鶴揚州遊已倦、竹西歌吹閒雲戀。二分明月寄愁多、廿四番風賞花徧。揚州花事夙昔誇、太平樓閣栽家家。鳳尾白看連瑞露、鹿胎紅更映朝霞。谷口園林尤莫匹、金玉相輝春一室。金帶圍開四萼聯、玉盤盃湊千層密。就中奇品御袍黃、粉汗更衣染御香。矜寵允宜膺九錫、風華獨出冠群芳。主人好事饒詩興、置酒看花掃三徑。徧召批紅判白才、廣徵嚼蕊吹香詠。

兼澤近草

梁節臨

先生字磐重、鄉籍待考、清代諸生、著有兼澤近草。見溫汝能纂輯之粵東詩海卷六十九。
送余正中還浙

一路薰風促馬蹄、萬山相送草萋萋。思尊君自歸蘭渚、冒雪余將入剡溪。古渡煙晴人獨遠、高林雲覆鳥空啼。若耶秋水休垂釣、此日天涯尚鼓鼙。

鐵橋道人詩

梁嶠

先生字喬山、鄉籍待考、清代布衣、自號鐵橋道人。見溫汝能纂輯之粵東詩海卷六十九。
客夜

草當山月白、竹榻松風清、客子通宵坐、寒蛩幾處鳴。

采山詩存

梁澤

先生字珩白、一字采山、鄉籍倫敦、清康熙己卯、公元一六九九年舉人。官歷海鹽知縣。乃前朝梁榑之孫、爲寒塘詩派之後、幼廣見聞、得爲一代循吏。見咸豐縣志、粵東詩海。
過雪聲堂懷陳巖野先生

先生生長難忘地、自顏其堂曰雪聲。雪有雪之意、雪有雪之情。雪意云何、垂垂欲下水生波。雪情云何、慘慘初凝氣凍河、亦可爭光乎日月、有時化作萋宏血。亦可感動乎風雷、有時變作子房椎。胡爲乎不變復不化、蕭蕭瑟瑟、打窗敲瓦。喚人一木支大廈。知君欲借竹梢風、銀沙玉粒玲瓏。凍就水晶宮。不過黃河心不死、誓死不滅春蠶字。春蠶食葉有貪心、貪生何以報天子。天花落地本無聲、聊與人間醒睡思。

變菴詩稿

梁善長

公字崇一、又字變菴、鄉籍倫敦、其先世於宋代來自河南省官於粵東、宋亡不出、隱居民

間、歷元明兩代、尋而徙籍本邑。公幼承家學、登乾隆己未、公元一七三九年進士、歷任粵秀書院主講、歸而築室鑑塘、日與羅天尺、蘇珥、何夢瑤、陳海六等、討論聲律、嘗搜羅十三州郡薈百家而纂輯之、成廣東歷朝詩十二卷、名曰詩粹。論者稱其持擇精嚴、折充甚當云。列傳見咸豐縣志、詩一章見溫汝能纂輯之粵東詩海卷八十一。

西樵雲瀑

千仞樵峰石、經常瀑布飛。隔雲仍有色、向日更添輝。冰鑑懸霄漢、湘簾捲翠微。尋源自深處、端可滌塵衣。

景鄴堂詩稿

梁濟川

先生字暨舟、鄉籍待考、清代廩貢生、官徐聞訓導、著有景鄴堂詩稿。見番禺凌揚藻評輯之嶺海詩鈔卷十五。

呈馬嶸山夫子

絳帳名家得嗣音、斗山藉藉石門岑。六經學比西京湛、一瓣香留嶺表深。著述時鐫充棟簡、解推頻罄賣文金。淋漓大筆驚神鬼、紙貴多應爲越吟。

鳳公詩存

梁儀

先生字鳳山、鄉籍待考、清代布衣。事略亦待考。詩存二首、見番禺凌揚藻評輯之嶺海詩鈔卷十七。

初到小金山

通幽幽徑隨僧入、枕僻閒門爲客開。卻笑坡公好奇怪、生前多事話輪迴。

珠江竹枝詞

相見情多別亦多、舞衫藏舊奈誰何。小娃不識離人恨、夜夜燈前索學歌。

若農詩存

李文田

先生字若農、又字仲約、鄉籍江尾上村。生於清道光十三年、公元一八三三年、咸豐九年公元一八五九年、登進士、以一甲第三名及第、授翰林院編修、遷武英殿纂修、國史館纂修、入直南書房、歷任四川、浙江、江南各地鄉試考官、順天、江西學政、累擢內閣學士、禮部右侍郎。至光緒二十一年、公元一八九五年卒於北京官邸。壽六十有二。先生居官廉介、讀書手不釋卷、既嫻於經史詞章、益通博金石碑帖、爲一代名家、遺著有元史地名考、塞北路程考、和林金石錄、四庫提要書表注、雙溪醉隱集等等。列傳見民國己巳縣志及陳荆鴻編著之藝文叢稿、詩章見鄒崖逋者鈔讀之嶺南詩存、及先生之文孫李棧齋教授之出示手錄。又見福建省侯官縣陳衍石遺主編之近代詩鈔。

題阿克蘇出土劉平國碑

漢武輪臺畫廟謨、五單于弱避龍居。誰料季葉威棱在、甌脫猶留未將書。《元史龍居河名》

又

達阪高高比可汗、穆蘇爾嶺最巔岼、故人施宿工搜訪、不字貞珉尺二寬。

又

蒲海裴岑出最先、沙南侯獲近祁連、窮荒更遣菁華露、禮器碑刊僅二年。《裴岑沙南侯皆碑名》

又

安得穹碑盡日摩、風雷雖動儘蒐羅、北征錄與西遊錄、說著今人見不多。

又

論舊惟聞盛孝章、一時淵雅數天潢、鬱儀重出更生在、手釋新碑字字香。

光緒癸巳視學順天自古北入關經居庸至宣化雜詩四首

永平郡樓

漁陽東部古藩屏、城闕峩嶢鎖渤溟、嵐氣宵深連海白、燒痕春暖入關青。天臨碣石星分尾、地接巫閭屋建瓴。且喜中興烽火淨、麥疇殘雪潤郊坰。

順義懷古

牛頭山畔石樓西、故壘當時化縷隄。恩重杯池營第宅、勳銘街塔紀招提。傳聞白海屯軍盡、想像紅橋戰馬嘶。重向迤羅臺上望、翠岑千疊總淒迷。

多倫諾爾懷古

上都寒殿概煙霞、巡幸年年說帝家。龍虎平臺稱捺寶、鴛鴦名灤近亨嘉。陪京四達興和路、恨事千秋晃忽叉。惆悵聲明剛未造、鋪張文集徧中華。

宣化道中

左臨虎北右飛狐、舊國千年憶霸圖。絕塞關山秦上谷、極天嵐采漢軍都。明昌巖苑生禾黍、統漠荒臺長樺榆。樵牧不知兵燹事、沙陀斜日覓湛盧。

萬安宮遺址三首

阿爾臺山白草肥、萬安宮殿舊都畿、當年突厥兼回鶻、兩代牙庭化夕暉。

鄂勒昆河足射雕、昔令哥水綠迢迢、金蓮池醉溫泉獵、誰管元昌王氣銷。

斷瓦殘璫歲月深、沿河翁仲草蕭森、碎碑滿地無人拾、歎息圭塘許翰林。

和林金石詩

處月穹碑接暮雲、眩囂介弟舊能軍、因思移刺雙溪集、字字分明闕特勤。《碑名》

癸巳試院雜詩

一統皇元志不虛、熱河人到採無餘、當年傳是樓中物、世上還疑有此書。

常卿六兄屬集杜牧劉滄

碧山終日思無盡

黃菊滿籬應未凋

仲約李文田

李文田

楷書七言聯

天山草堂集

李文燦

先生字興韜、鄉籍陳村、清代貢生、嘗爲賊所困、歷七日而談笑自若、力言鄉中貧苦者居多、賊乃釋去。平素多讀書、有李書櫃之稱、著有天山草堂集。見粵東詩海卷六十。

臨滄海

黃河東翻、海爲之歸。不有洪流、安擇細微。千山若失、百派爭飛。以茲廣大、惟天庶幾。鯤蛟騰躍、螺蚌韞璣。滔滔者逝、白日何依。幸甚至哉、歌以詠思。

代古讀曲

本是一盤水、居上遂爲冰。爲水性自軟、爲冰有鋒稜。小郎讀書歸、直自娘索果。妾子又入門、徘徊始視我。

哭歐舍人

知交遍四海、投老亦荒村。月照展書席、風開修竹園。跡真鄰靖節、才肯近虞翻。遺草應無恙、名山千古論。

送蘇未人遊浙

五陵遊不易、寶馬任經過。舊俗爭詞賦、新知薄綺羅。春歸蘇小柳、恨滿越人歌。爲問岳墳事、南枝近若何。

柯山草堂集

李德林

先生字宗博、鄉籍逢簡、清康熙歲貢生、選任化州訓導。著有柯山堂集、其詩受一時之推許、有若海水之泪没、山林之宵冥、群鳥之悲號、又峻快之似謫仙云。見溫汝能纂輯之粵東詩海卷七十三。

蝴蝶歌

羅浮仙人騎鳳去、仙人遺衣掛琪樹。衣化蝴蝶何繽紛、參差錯繡鳳凰文。鳳凰一去徒相待、蝴蝶栖山長不改。我欲騎之作鳳凰、翩如乘雲飛帝鄉。問帝鳳凰何時來、調和律呂陰霾開。毋使龍蔥落秋實、鳳子空結雲霞胎。

禽言

布穀布穀、布穀央時穀不熟。官人催租朴爾肉。顧姑顧姑、顧姑兮姑樂、伊胡爲兮喚姑惡。

村居雜詠

小溪迴百折、溪盡海門通。孤棹依漁浦、中流下釣筒。山光侵岸紫、水氣上天紅。落日青蘋動、涼颿滿短篷。

秋夜登縣城西山

步月出林杪、霜容瘦一峰。振衣發孤嘯、栖鶻鳴高松。望遠嫌三面、攀危更幾重。秋思清已絕、吟罷古壇鐘。

田家即事

暖風拂面日初長、竹裏花間戶戶忙。牧豎去吹牛背篋、媿妻歸賽馬頭娘。一坡螻蟻爭芳草、幾點蜻蜓趁夕陽。共道明朝雷雨好、隔籬相慰酒瓶香。

五日

楚城三戶更何存、此日江津空復喧。已分寸心長對水、豈應杯酒便招魂。共矜旆影翻雲日、爭駕潮頭入海門。一箇腐儒成浩歎、獨歌殘此立黃昏。

送龐西牟北上

露下蘋洲煙水明、紅螺千盞醉江城。一聲畫角收殘月、萬片寒花傍曉程。河路日遲冰未斷、宮門春暖雪初晴。吟鞭此去風光好、駟馬相如最盛名。

北遊詩草

李德炳

先生字宗謙、鄉籍逢簡、德林之弟、清康熙己卯、公元一六九九年舉人。官歷高陽縣令。著有北遊詩草。見溫汝能纂輯之粵東詩海卷七十三。

觀穫

勞農當九月、爽氣發長林。古木盤空谷、清泉濯素心、棗紅添日色、梨白在秋深。於此尋詩路、幽風獨自吟。

石門懷古

車馬勞勞直至今、石門蹤跡夜中尋。枯楊葉盡風歸戶、古廟燈寒雪在林。浮海已聞夫子命、殺雞還記丈人心。相逢客路多知己、誰道西方有好音。

鳳岡集

李殿苞

先生字桐君、鄉籍陳村、文燦之子。清代貢生、著有鳳岡集、醉餘諸草。見溫汝能纂輯之粵東詩海卷七十三。

海珠祠謁忠簡祖遺像

寒結珠江入望微、庭梅低放一枝枝。龍頭會散留香火、箕尾星懸燦海祠。雪湧浪花當戶入、風含島樹隔簾吹。與君漫道前徽遠、砥柱中流百世師。

李郎吟稿

李大作

先生字益之、鄉籍陳村、清代諸生、李殿苞之孫。見溫汝能纂輯之粵東詩海卷八十一。

海幢寺

停舟遊古寺、獨客恣登臨。不雨花常潤、無雲徑亦陰。鐘聲餘小室、梵語逗高林。德士參禪後、焚香或弄琴。

吟香閣詩

李慕周

先生鄉籍待考、號馬溪吟香閣主。清光緒三年、輯羊城竹枝詞、南海黃敬祐首選、南海王植槐亞軍、先生獲季軍、俱見南海余少飄編之廣東歷代詩鈔卷五。

羊城竹枝詞

二月煙花士女俱、大通古寺謁浮屠、羅裙八幅花團錦、繡入羊城八景圖。

又

蛋雨蠻煙水國村、珠兒珠女萬家屯、願郎莫學西流水、一去無回出虎門。

又

柳波漾畔柳如絲、荔子灣頭荔實垂、花國遍生紅豆子、與郎何地不相思。

郊行吟

李青山

先生名銳淦、爲布衣、鄉籍待考、詩一章、見龍山陳緯南公遺著手書清詩拾萃。

郊行

清明時節插秧齊、短短姜蒿水上隄、對岸綠雲遙隔斷、鷺鷥飛過野塘西。

香留吟草

李夢蘭

女史鄉籍待考、事略亦待訪、詩一章見溫汝能纂輯之粵東詩海卷九十六之閨媛部、只注夢

蘭順德人五字。

詠燕

二月園林桃杏開、重回還識舊樓臺。固知冬向山中蟄、浪說春從海上來。微雨柳塘沾綠絮、掠泥花徑帶蒼苔。烏衣舊宅何人住、滄海桑田幾劫灰。

瘦暈山房詩鈔

羅天尺

先生字履先、號石湖、又號百藥居士、鄉籍大良。生於清康熙二十五年、公元一六八六年、卒於清乾隆三十一年、公元一七六六年。祖澹峰、清順治戊戌進士。父世舉、清康熙癸酉副貢、授定安教諭。天尺以年少苦學、得心悸疾爲藥鑑所困、因延至年四十始中式舉人。事見咸豐縣志、詩見嶺南詩存多篇。先生平生講學之餘、肆力詩古文詞、與蘇珥陳海六輩稱惠門八子、文名藉甚、傳世之作、除此詩鈔外、有五山志林八卷、其自序云：

余年十七、應府試五羊、日竟十三藝、得悸疾、掩關石湖瘦暈山房者十四年、先大母梁夫人扁棄筥閣置四子書、不得讀、日抽案上散帙稗官野史以消永日、自念太史公周流天下、乃獲著史記、余扁斗室中、動十數年、無從閱歷、得古今天下掌故、而錄纂以成一家言、身所未歷、不可徵信。遂於邑中近事耳聞目見者、輒錄投敗麓中、雍正六年、詔天下纂修大清一統志、余邑大夫柴公謬采虛聲、命與諸君子編輯中、未閱月、藩憲王公檄爲省局分校、屢辭不獲、在局三閱月、又以多病不任事、荷總局庶常魯公放歸里塾。兩次從事、雖未有所撰述、而得備覽其中嘉言懿行、心有所欲、輒自私錄一冊以歸、蓋亦耳所習聞、目所習見、可以傳信者也。十年間、省試公車之暇、授書馬甯、錦巖、羊額諸塾、甘爲臆計、村莊無事、遂得理其前後所錄、畢注之冊、合前朝國朝爲八卷。內有標題、名曰五山（登俊、拱北、安東、梯雲、華蓋、）志林。要皆敘述舊聞、組緝名論、竊比鈔胥、間有論著、亦明向往、非敢有所予奪於其間、總以志吾病閒之歲月已耳。乾隆辛巳中秋日書於石湖之雞度軒時年七十有六百藥居士羅天尺撰。

閨情

美人情何癡、愛教鸚鵡語、鸚鵡不能言、倚闌淚如雨。

順德詩澂

送岑衡湘之楚

仗劍出門去、揚帆不暫停。雪沈衡岳白、山入洞庭青。弔古尋香草、懷人上驛亭。不堪聞過雁、吟對滿江星。

過金榜山菴題門人陳官書齋壁

柴門鎖峰色、一徑入煙蘿。之子自幽獨、老夫亦閒過。四鄰山鬼笑、七字野僧哦。況與西郊近、秋冬射獵多。

羊城晤何十贊調歸自遼陽因柬蘇二瑞一

生計知誰是、相逢萬事非。老尋珠海友、生自玉門歸。賣葯成仙易、論心入道微。東坡同有約、商議買魚磯。

不見

陳生久不見、何處問飄零。官罷年猶少、詩成鬢欲星。憑誰話巴雨、同去弔湘靈。望斷程鄉道、長亭又短亭。

馬寧村塾晤何青門

黃葉燒燈十載甘、名賢風韻汝能諳。鄒崖半把茅茨底、即是龍泉一角庵。

又

白眼青衫見性情、牢愁相慰復相評。典琴名士終何惜、不賣新彈大蟹行。

送樂塊然歸東鄉

相逢論古眼雙明、嚼罷紅柑拂袖行。白鶴肯供人役使、天池未算一狂生。

又

騎虎鞭龍不是頑、狂歌罵坐向人間。閒來借箸成何事、不畫關中百二山。

君臣塚爲明末唐王朱聿鏞與蘇觀生葬處

流花橋北蔽蒿萊、孰與荒原酌酒杯、一死未慚俘緬日、九泉休羨霸齊才。鍾山空有遺民淚、宮樹誰爲內監哀。不道白雲兵燹後、孤魂猶得伴朝臺。

過古樓尋鄒汝愚太史謫仙亭

從來無定是煙霞、路繞層巒見落花。才子何妨爲吏目、孤臣終合老天涯。苔封淺澗眠黃犢、葉暗前莊叫暮鴉。我有菖蘭無處薦、一條江水似長沙。

香奩

花冠初戴步遲遲、綺語分明誤畫眉。生愛夜吟忘膽怯、近耽春病怕人知。咒桃法好教鄰女、刺蝶衣新賜侍兒。多恐舊栽萱草地、漸添紅豆一枝枝。

賁園詩稿

羅天俊

先生字雨三、號賁園、鄉籍大良、天尺之弟。見溫汝能纂輯之粵東詩海卷八十。

巖月

石室生虛白、夜寒疑雪侵。忽看雲斂岫、始覺月窺林。鶴夢冷潭影、梅花清道心。山僧偶出定、聽我一彈琴。

萬翁詩稿

羅沃槐

先生字源萬、鄉籍待考、清代太學生、詩存一章、見番禺凌揚藻評輯之嶺海詩鈔卷十六、或說爲大良人。

曉起

雨色開新晴、晨光入簾照、寒梅初著花、春在庭前樹。

偶然齋集

羅甯默

先生字仲恭、鄉籍三桂、乃清初貢生、與同邑碧江蘇士許、陳村李文燦同時、俱擅才名。甯默先世多藏書、因得盡窺其奧、乃善詩詞、性寡言笑、故其爲詩、曾受南海梁佩蘭有云「仲恭詩出脫古人、不肯規模古人、其孤處似雲、空處似秋、香處似梅、淨處似雪、冷然似山出泉、皎然似潭貯月、寂然枯禪、屹然古鐵、體體起雷造冰、字字剗心瀝血。」果真如此。事略見咸豐縣志、詩章見廣州陳永正主編之嶺南文學史。

行路難

葉莫綴高樹巔、家莫臨大道前。高葉先風落、大道多兵行。兵行強捉人、雞狗不聞聲。大男走上屋、幼男路旁啼。索母不復見、但見鄰家阿父色慘淒。左持斗粟右隻雞。訴云子孫死亡盡、飄零獨有竈下妻。長官怒如虎、老命不活汝。我刀殺人九十九、所爭汝一驢頭耳。況乃軍役輕、牧馬與負矢。去去不須辭、人生無兩死。老翁忍氣驅就道、老嫗眼枯卻絕倒。

憫農謠

去年懶不種蝦鬚稻、今年耕不拔牛筋草。五畝湖田大半荒、蘆花夜落青霜老。大兒遠從軍、生死望斷秦關雲。小兒應州役、鞭撲肌膚不自惜。鄉園果又十樹九樹枯、軍餉迫迫無時無。一限牢繫二限誅、長官怒氣連虬鬚。上有大僚督促之飛書、下有半生不死之刑餘。天乎、天乎、何當雨金又雨粟、公廩私囊盡霑足。竟挽天河洗甲兵、官家醉臥黃金屋。

余前民白衣庵置酒

入林且緣徑、不知身在山。豁然上空綠、一刹如雲閒。萬峰次其前、樵聲相往還。折竹落霜粉、長夢垂煙鬢。故人肯相待、展席青蔥間。高秋帶靜色、百慮早自刪。我何欲爲異、臨風共頽顏。

集義軒詩

羅惇衍

先生號椒生、鄉籍大良、曾祖禮綿、清乾隆五十九年甲寅舉人。祖父嵩、淡科場、而通貨殖、亦賈亦儒。父家政、嘉慶十八年癸酉舉人、歷任高州府教授、粵秀書院監院、勤辦夷務有功賞加五品銜。惇衍生時、紅光滿室、周歲即岐嶷異常、道光十五年乙未、公元一八三五年登進士、授編修。歷四川鄉試副考官、山東鄉試正考官、恩科會試同考官、咸安宮總裁、太僕寺卿、吏部右侍郎、戶部尚書、工部尚書、翰林院掌院學士、武英殿總裁。晚年以母喪告歸、旋卒於鄉。遺著有濂洛關閩六先生傳、集義篇、百法百戒庸言、感應篇引經箋注、孔子集語等。列傳見民國己巳縣志、詩章見鄒崖逋者鈔讀之嶺南詩存。

郝經

金明池上雁高飛、蘇武南還爾北歸。夷夏幾人全使節、江淮三路策兵機。魯連表斥機姦舛、陳壽書釐體例非。猶憶和菹親疾療、九齡奇慧世間稀。

楊維禎

一枝鐵笛萬梅花、譜得清歌倚鳳琶。座上親朋雜方外、集中樂府自名家。小營臺圍輕三島、歸去神仙迓九華。赴闕十旬成史例、白衣瀟灑又天涯。

石湖吟草

羅孫耀

先生字澹峰、鄉籍大良、清順治戊戌進士、官曲江教諭、貴州都勻推官、晚年隱於鄉石湖別業、時與名士結社流連山水以終餘年、事略見咸豐癸丑縣志、詩章見鳳山詩粹。

湖閣夜雨

溜瀉簷階鎖夕煙、竹聲杜響共蕭然。一天雨掩閒吟閣、半夜風橫罷釣船。花委暮林香漠漠、草低寒砌色芊芊。此心不逐疏櫺去、好背孤燈便學禪。

饑驅集

羅世學

先生字臣廉、鄉籍大良、羅孫燿之子、清康熙癸酉副貢、官定安教諭、晚號稜匡居士、著有饑驅集。見溫汝能纂輯之粵東詩海卷七十二。

初春送尹闡之年兄歸寶安

海燕巢朱戶、幽蘭隱空谷、嗟彼陌路草、青青破車軸。雨露會有時、托根良不淑。遊子返故鄉、征鞍落日促。攬轡行踟躕、薄送城南曲。下馬歌苦聲、聲聲苦斷續。江上有處女、餘明不負燭。

遊甘灘

打絳趁潮潮正急、急潮不住打絳忙。湖翻石壁雪花滾、絳撼江流霜霰長。野渡浮沉衣半濕、漁舟上下網成行。風和如此殊不惡、況復鱗魚新膾香。

羅氏吟草

羅慶榮

先生字季躍、鄉籍大良、清光緒己丑、公元一八八九年舉人、官歷內閣中書、事略見民國己巳縣志選舉表、詩章見順德市博物館藏順德歷代士林書畫專集。

贈渭南仁兄

新晴春色滿漁汀、小憩黃鱸畫槳停、七里水環花市綠、一樓山向酒人青。

又

綺羅堆裏埋神劍、蕭鼓聲中老客星、一曲高歌情不淺、吳姬莫惜倒銀瓶。

又

歌版當年出絳紗、綠衣紅袖盡沿華、只今便面春風在、曾向章臺拂柳花。

山領南近代四家詩

于右任署簽

瘦菴詩集

含光署

民國甲午冬日
新夢州堂彙刊

瘦菴詩集

羅惇融

先生字揆東、別署瘦菴、鄉籍大良、清光緒廿九年癸卯、公元一九零三年順天副貢、歷郵傳部郎中、一直棲遲京師、以至公元一九二四年病逝於斯。晚年以寫詩聽曲自遣、因一代名伶之梅蘭芳程豔秋曾師事之。詩亦名世、公元一九五四年甲午樂昌張昭芹將其與同邑黃節、番禺梁鼎芬、揭陽曾剛甫、編印爲嶺南近代四家詩於臺灣流傳、本刊皆從此節錄。

盤山宿萬松寺

千峰絕頂支床處、夢裏松濤雜梵聲。高月轉霄迴夜氣、空階鳴葉迸涼醒。萬緣滅後歸禪味、一枕頽然接太清。樸被尚思從老衲、稍憐寒拾不同盟。

辛亥九月梁任公自日本須磨歸國相見於遼東旋同還須磨

相期四印齋頭坐、翻踞雙濤閣上層。山鬼女蘿松月下、敦煌經卷佛前燈。百年此日並哀樂、一姓何當問廢興。歸去倘攜三島月、海山雲氣夢飛騰。

晨起偶成示曾剛甫何翹高澔毅夫

煖旭觚梭散積陰、花前負手費沈吟。經過憂患供談笑、回望谿山變古今。春鳥丁寧思早計、故人慷慨謝朝簪。東門帳飲知無緒、攬結河橋柳十尋。

廣雅圖爲黃晦聞題

槐柳凋疏松折斂、亂餘歸計尚難諧。廿年不蹋西村路、橫舍回思壁字齋。起廢近推吾子健、題詩喜有阿連偕。全荒學殖嗟頽散、空撫丹青眼倦揩。

余昔與舍弟數菴肄業廣雅書院居壁字齋今同題斯圖有懷往事

玉泉山靜明園

趵突巖迴碧玉流、相從一櫂鎮夷猶。青冥塔破山皆俯、白日林陰氣正秋。遺跡金元荒佛火、盛時臺殿付清遊。遙峰挾雨催歸步、虛對風軒負茗甌。

德州道中

斷蘆層郭帶煙深、亦有人家俯碧潯。大野西風吹木葉、長河片席掛秋陰。垂虹尚有依林意、歸犢原無戀暝心。坐想鼉梁飛渡意、殘陽沒處萬鴉沈。

重宿泰山斗姥宮大雨

坐賞風泉萬玉鳴、忽驚雨勢挾山傾。全收岱頂千岩水、併作樓前一夜聲。積潦路愁明日阻、禪床夢與隔年清。曼陀花已經秋謝、踏遍蒼階惜此行。

十二月二十九日集法源寺爲陳后山逝日設祭

工詩固多窮、人自窮非詩。后山力與文字遠、未必富貴隨。后山奇窮者、風義照一時。平生尊坡谷、坐此迫寒饑。淪謫百不悔、凍死天下知。落落二三子、遐躅勤摹追。相攜就蘭若、酌以酒盈卮。寒風迫除歲、蔬果僧爲治。欲招千載魂、同慰平生思。霜竹搖暝陰、貞松挺寒姿。似參曹洞禪、試語參寥師。謂道階上人

清明視亡兒佛生葬處

舊栽榆柳高於我、汝在泉臺長大無。經歲一臨嗟太愨、斜陽百轉欲相呼。望中青草回春燒、屋角黃雞引衆雛。魂小不知來入夢、竹梢寒響月痕孤。《燒字讀仄》

清明上巳約群公脩禊大通河

此地原非薄落津、吾曹天許得閒身。遨遊正好不分日、起倒驚過一半春。詩社重提宣統末、片時能作永和人。白頭師傅同懷舊、廢寢拋筵鬆蒼松感作薪。

壽曾剛甫五十

辛苦能營下潁田、農夫識字意安便。讀平聲蓋頭茅把寧訶佛、穿坐藜床不計年。此口最宜惟飲酒、有居無碍更牽船。養生著論還多事、午枕醒餘起茗煙。

丁巳三月三日十刹海脩禊分韻得磴字

今年上巳遲、稍覺春氣迥。選客多舊人、夙約屢延頸。去年高會輟、苦遭兵事梗。節已負重三、天不私一姓。猶留好風日、依然共遊騁。長安艱得水、十刹湖淥淨。春光濃十分、黃鸝更三請。葑滿嫩芽長、柳出高枝靚。相從俯清流、安用躡危磴。客散我歸遲、高樓連樹暝。

正月十三夜置酒齋中賈郎璧雲梅郎蘭芳姚郎玉芙尚郎小雲程郎豔秋並集以詩紀之

預借張燈作上元、爭看玉貌對清樽。人材此外應餘幾、春色今宵倍覺溫、何必軒車皆夙約、錯疑桃李屬吾門。平生賞俊無偏愛、醉把花枝與細論。

壽梁節菴師傅六十

陵樹栽成已作陰、在天常鑑老臣心。共知納誨忠難並、敢謝回天力不任。細數平生留節在、每於文字見情深、黃封猶得霑新賜、及慶朋觴對酌斟。

又點招集崑三宅聽諸郎度曲

嘉會今宵第四回、燈屏春色落深盃、坐中人物皆清俊、祇欠程郎病不來。

前題之二

萬口流傳散花劇、梅郎日唱碧栖詞、更煩怨曲燈前唱、不數旗亭畫壁時。

敷菴弟中秋遊盧溝橋有詩因和一首

柴車曉月經行處、今日飄輪一瞥過。石火炎天餘戰伐、金源帝迹換山河。閒拋秋色吾知懶、已轉天心雨漸多。收取晴光歸畫稿、閱人隄柳近如何。

題瑤卿琴儂蕙芳妙香鳳卿慧寶璧雲怡雲諸伶畫冊

薦紳厭騷雅、弄筆在伶官、亦有絃歌趣、休將粉墨看。東風好擡舉、入手定艱難。莫遣酸儒見、攢眉更索瘢。

題齊白石花鳥畫冊

青籐雪箇皆神筆、三百年還見此人、共展幸無寒具污、細看彌信掇皮真。相過蕭寺忘長晝、貽我生綃亦絕倫、悵憶王翁此高會、花前共爾一酸辛。白石爲王湘綺翁弟子句內汚字讀仄音遇韻

癸亥除夕

吾命偏能重一毛、作詩火急似追逃。卻從病久知兒孝、自諱囊空念婦勞。世每憎狂聊復縱、出無所詣誤成高。餘生天許閒中樂、那有煩憂更續騷。

甲子元日

天開泰運我更生、甲子人人望太平。騎歲梅花釘元日、沸天爆竹闕春城。出門但有笙歌興、鄉夢猶餘戰伐聲。且復買燈娛稚子、笑看鵝鴨稻梁爭。

病起作

吾身侈頑健、沉復攝起居。自誇壁壘堅、久與疾病疏。倉卒不戒寒、病勢若決渠。治之幸不焚、肝鬲甫一舒。扶床起攬鏡、錯認山澤臞。窺窗見殘雪、且試盤中蔬。

又

平生不識憂、何者名爲苦、貧乃天所界、樂則吾自主。寬腸納宇宙、斗室在環堵。病魔爾何物、亦或敢余侮。泥我困床蓐、幽我閉門戶。苦我祇此乎、順受亦無忤。

又


病榻已強離、燈火能勉親。取攜甚自力、勿以煩家人。據案始獨坐、稍覺夜氣新、輟詩逾數月、製曲恒自珍。今宵一伸紙、一瀉無逡巡。吾詩如里謠、放蕩足一欣。

病院作

平生自詡安心法、每爲嗔痴損道功。今日病中纔澈悟、萬緣滅盡一心空。

三山以籀學
 詩步說復堪





大坡臨墟學末工硯田珍
 獲稅孔淵三日子未曠身
 未曠怪左臂之先跡兮
 半取癩年未毫兮胡為
 乎就鐘吾那片 吾素
 兮折之弗一改之初衷
 此像造打戊子八月未隔四
 年依然如我 辛卯方檢照
 作楫彌錫亦念
 七十多八寺人 難按後堪



三山移學詩淺說

羅敷菴

翁又號復堪、諱惇暖、鄉籍大良。生於清同治十三年、公元一八七四年、父家勤公爲道光間進士、官歷刑部主事。翁壯歲即離鄉北游、往來燕滬白下間、多與當時士大夫輩唱酬雅會、惟以不善治生之事、終而潦倒京華、至暮年始以其所擅章草書此淺說寄港、至謝世後二十六年（一九八一年）得其彌甥黃作楫及邑人伍絜宜何竹平爲之醴資。何叔惠董其事、以原版共六十一頁刊行傳世。

全文如次

《漢書藝文志》曰：『詩以正言、義之用也。』《隋經籍志》曰：『詩者、所以道達心靈。歌詠情志者也。』是能理性情、感人心、莫切乎詩。何謂理性情、則必如《關雎》之樂而不淫、哀而不傷、然後可以得性情之正、故山谷教人爲詩、在乎精研經史、蓋亦知所本矣。至於感人心、則必出於溫厚和平、縱有刺時之作、須仗言者無尤、聞者足誠、又非得力於三百篇不可。余十六歲始學爲詩、家藏古籍頗多、讀書之暇、嘗檢《全唐詩》瀏覽久之無所入、乃知非得江山之助、無以發其心靈、及遊雞林、愛北山之峻拔、龍潭之幽邃、常與吟侶登臨其間、尤喜松花江之宏麗、每於冰泮時、登江畔高樓、觀其所至。俗云開江有文武之別、文開時、聲如裂帛、頃之、冰流與水細細相激盪、又如玉珮之音、鏘鳴不已、於是思發泉湧、神志一舒。若夫武開、則猛如怒虎、響若崩山、軋盤涌裔、其勢莫當、忽覺壯懷磅礴、彌漫四海、此一時也。洎夫陟姑蘇之園林、訪餘杭之湖山、目曠神怡、深情繇邈、延賞自得、嘯坐忘機、此又一時也。余居白下最久、獲與諸老游、而南來之詩人、攻錯之益友、商量舊學、選勝尋詩、挹西山之爽氣、緬北海之清華、凡有招提之處、無拘遠邇、足迹必至。七十後左體偏枯、蟄居不出門戶、而吟詠不廢、凡漢魏六朝唐宋諸名家、多所涉獵、獨從山谷後山

而上追少陵、加以憂國哀時、百感交集、有欲罷不能之勢、往往枕上推敲、得詩數倍於前、茲述經歷、聊以所知示子孫賢門人、非敢爲能詩者說也、世多宏達、有以正之、幸甚。

漢詩典質樸奧、與雅頌相近、最難學亦不得不學、每到不能解處、須細沈思、到不可學處、仍勿放過、余雖不能至、而心嚮往之。

左克明古樂府曰：漢魏之世、歌詠雜興、皆詩人六義之餘也。如三曹七子、猶有古人之遺風焉。自晉遷江左、下遞六朝、風化寢薄、新聲熾而雅音廢矣。

方植之有言曰：陳思天資、既高抗、懷忠義又深、以學問遭遇閱歷、操心慮患、故發言忠愍、不詭於道、情至之語、千載下猶爲感激悲涕、此詩之正聲、獨有千古不虛耳。同時惟仲宣局面闊大、語意清警、差足相敵、偉長公幹輔佐之耳。

魏晉之間、阮籍別爲一派、與陳思王相匹 鍾嶸詩品曰：其源出於小雅。司馬氏之初、則左思劉琨郭璞三公鼎足、莫此爲盛、而左之挺拔、源出劉楨、劉之清剛、源出王粲、郭之豪雋、源出潘岳、過江而後、篤生淵明、淵明之誼、卓絕後先、三百篇之遺也。宋代詞人、則以謝靈運鮑昭爲首、而謝源於陳思、鮑源於張協張華蕭齊、則謝朓獨步一時。梁代右文作者爲衆、若江淹何遜、並冠詞壇、沈約范雲吳均柳惲、差堪羽翼、北周則庾信爲優、隋則楊素獨擅、此其大較也。

至若唐初王勃楊炯盧照鄰駱賓王、號稱四傑。繼其後者、蘇味道李嶠崔融杜審言、亦號四友。洎開元天寶間、李白杜甫特出、太白思逸神超、天才卓越、少陵上薄風雅、獨有千秋。其時又有王維李頎高適岑參輩、亦鳴其盛。至大歷十子盧綸吉中孚韓翃錢起司空曙苗發崔峒耿漳夏侯審李端稱焉。若夫韋應物之古淡、柳宗元之峻潔、並耀一時、而韓愈體局博大、鼓吹六經、足繼杜甫。他如盧仝賈島、慕東野之風、一變而爲澀僻、幾令人不可卒讀。於是元稹

白居易矯其失、詩主易讀易解、並流爲輕率淺俗。乘時而興者、溫庭筠李商隱獨尚聲律、觀其詞華典瞻、照耀晚唐、然溫之綺靡、李之纖穠、遂開西崑之習、變本加厲、流弊日甚、又豈兩公逆料所能及哉。

五季之世、挹溫李之風、晏殊錢維演楊億劉筠創西崑體、楊億集十七人刻西崑酬唱集、石介作怪說以刺之、可謂特識。第以楊劉先後在禁中、倡近體爲天下宗尚且四十年、猶一旦未能革也。

梅聖俞蘇子美起、而西崑之箴戢、梅聖俞旨趣渾古、蘇子美能爲古詩歌、盡翻西崑窠臼、在初變之時、梅爲之倡、歐陽修爲之繼、然永叔上承韓公、下啓及門、有足考焉。又如王安石之清新雋朗、蘇軾之廣博豪邁、亦足輝映前後。若江西宗派、以黃庭堅爲大宗、山谷詩學、得自其父黃庶及其外舅謝師厚、此二公者、皆學杜、而山谷詩雖學杜、實能自成面目。洪炎序其詩、稱其包曹劉之波瀾、兼陶謝之字量、可使子美分座、太白卻行、誠知言也。況其孝友之行、追配古人、風節之高、老而彌劭、是其詩可法、其人尤可法也。陳師道學詩於山谷、或謂其詩賢於山谷、王原序其集曰：後山之於杜、神明於矩矱之中、折衷於虛無之際、又謂黃之所有、無一不有、黃之所無、陳則精詣。綜其平生、高介安貧、傳堯俞懷金欲贈、而不敢出、趙挺之與裘不受、以至寒死、即其持身之義、人所難能、非僅以詩見長者矣。

南宋詩人則有尤袤蕭海藻范成大陸游、嘗誦楊廷秀句「尤蕭范陸四詩翁、此後誰當第一功、新拜南湖爲上將、更牽白石作先鋒。」尤蕭詩未得見、范則適勁婉峭、陸則豪宕沈鬱、局度自然、同時堪伯仲者、則有楊萬里、楊雖疎枝大葉、而氣象宏闊、亦江西派者也。放翁蹤迹似杜陵、而多歎老嗟卑之句、惟其憂國之思、至死不忘、於其示子孫詩可見、若姜夔、則清麗精密、風格高秀、又誠戛戛獨造者矣。

詩有出於摹擬者、摹擬一二人尚不難、謝靈運之擬魏太子鄴中集詩八首、雖頗得其意、然猶不免有謝家本色。若江文通雜體詩三十首、於漢魏己能近似。而潘張以下、乃有神肖者、各體中窮通哀樂、正變離合之情咸備、非天資學力一齊並到、曷克臻此、真古今一人耳。

有分韻賦詩、拈得險韻而因難見巧者、南史曹景宗爲右衛將軍破魏凱入、武帝於光華殿宴飲、景宗啓求賦詩、詔令沈約分韻、詩韻已盡、惟餘競病二字。景宗操筆曰：『去時兒女悲、歸來笳鼓競、借問行人、何如霍去病。』約及朝賢、驚嗟竟日、景宗敏捷、而其詩之巧妙乃如此。

聯句、於古未有、韓愈始爲之、集中聯句詩多至十首、長篇至一百五十韻、會合聯句於孟郊外、增張籍張徹。黃魯直云：退之會合聯句、四君子皆佳士、意氣相入、雜之成文。世之文章之士少聯句、蓋筆力不能相追或成四公子基耳。城南聯句、煌煌鉅製、宏博絕麗、有疑出於一人潤色者、恐未必然。二公才大如海、雖平日交相推許、而兩雄並立、正不須多讓也。詩有李杜並稱、太白古風、實足稱豪、然其奇而未正、不若少陵能救房琯、無愧於許身稷契間。李之不及杜有斷然者、東坡論詩人、稱杜首屈一指、洵不虛也。後有杜韓並稱、退之救敵起衰、陳言務去、誠足繼杜。昔人言孫莘老嘗謂老杜北征、勝韓退之南山詩、王平甫以謂南山勝北征、終不能相服。時山谷尚少、乃曰：若論工巧、則北征不及南山、若書一代之事以與國風雅頌相爲表裏、則北征不可無、而南山雖不作、未害也。是則山谷之卓識、早足驚耆宿者矣。

學詩固須多讀古人專集、而於歷代唐宋諸家詩話、不可不觀、蓋不讀詩不知詩之妙、不觀詩話不知詩之病、各名家未嘗無少病、知其善而效之、知其病而去之、斯爲善學、作者難、識者亦誠不易也。

詞意不宜太盡、出以頓挫、自免一往無餘之弊、故須善於控縱、然非從六經周秦文法尋味出來、不可將軍欲以巧勝人、盤馬彎弓惜不發。

欲知雅俗之分、譬如王謝家子弟、丰神雋逸、風度翩翩、雖顛沛造次、決無市井兒寒乞氣。作詩、要詩外有餘境、出真本領、吐真懷抱、方是言之有物、能動人心脾、若滿紙客氣、雖才華綺靡、只可作錦繡觀、亦麗以淫耳、於詩義何有。

有句法出於自勑者、杜少陵《秋興》詩：「香稻啄餘鸚鵡粒、碧梧棲老鳳凰枝。」《堂成》詩：「橙林礙日吟風葉、籠竹和煙滴露梢。」王介甫《金陵即事》詩：「背人照影無窮柳、隔屋吹香併是梅。」陸放翁《故山》詩：「傍水無家無好竹、卷簾是處是青山。」是也。

有謂詩主言情、文主言道、詩一言道、便落迂腐、然陸士衡詩云：我靜如鏡、民動如煙。陶淵明亦有詩云：「此中有真意、欲辨已忘言。」杜少陵詩云：「舜舉十六相、身尊道何高。」而其氣味之深醇、足見懷抱。黃魯直贈送張叔和詩：「我提養生之四印、君家所有更贈君。」；「百戰百勝、不如一忍、萬言萬當、不如一默。無可簡擇眼界平、不藏秋毫心地直。」、又氣盛言宜、何嘗有半點迂腐氣。

作詩貴先選韻、凡所欲達之言、欲運之典、約略思索、妥爲布置、然後用之、若韻不合手、雖有精思妙理、難於透發、故選韻亦應有之事、韻腳穩洽、方成佳章。

短章勿謂易作、必以醞藉爲佳、簡而遠、曲而通、約而餘、華而樸、缺一不可。

長篇又須開闔動蕩、氣象萬千、血脈流轉、韻味深厚、刻意起伏、擊首則尾應、擊尾則首應、擊中間則首尾俱應、方能入妙、否則散漫支離、力不能舉矣。

凡人意中所有之典、不可正用、避雷同也。或翻而用之、或虛而用之、或夾以議論而出之、以我用事、不爲事所用、乃得活法。

香山谷老人之山谷詩、硬語含風騷、變化不可方物、學之絕無俗、板、弱、三病。

學古人詩、不可不似、不似則不能探其奧、又不可太似、太似則失自己面目、似而不似、不似而似、方爲善學。

學貴能自得師、尤貴轉益多師、如蜂之採花、擷衆香而成蜜。庖人之烹飪、合五味以調羹、若不博覽、適以自隘、非所以成其大也。

白石道人謂詩之不工、只是不精思耳、一語道破。聞之古人曰、思之思之、思之不得、鬼神通之、未有不思而精者亦未有思而不精者、乃常人下筆、往往求速、自以爲淋漓痛快、而滿紙浮詞、將終身不見古人、是不精思之過也、詩乎詩乎、匪吾攸聞。

詩多作則滑、少作則生、必如後山詩、未嘗無謂而作、故其志意行事、自具其中、何滑何生之有。又言寧絀毋巧、寧樸毋華、寧粗毋弱、寧僻毋俗、尤須玩味。

喜賀詩、一味贊揚、便落俗套、必含有規勸意、方見交情。後山寄送定州蘇尚書詩：「功名不朽聊通袖、海道無違具一舟。」何等深婉。

哀輓詩能從閒淡中寫出、勝於徒述功德爲多。如後山丞相溫公挽詞：「時方隨日化、身已要人扶。」二句、黃魯直見而歎曰、陳三真不可及。蓋天不愁遺之悲、盡於此矣、由此可悟詩法之微妙。

詩格要高、高則脫俗、句法要響、響則韻諧、每句每字中、必須致意、多讀古人詩自知之。凡人作詩、謂如何熨貼、字面如何回應前後、抱實死典、執定死法不至、重滯拘牽不止、若知官止神行之妙、一洗此絀劣。

白石道人詩說：「思有窒礙、涵養未至也。」益當以學、學者宜三復斯言。

勺菴詩集

羅濂

先生字雲翹、號勺菴、鄉籍大良。生於清光緒二年丙子、公元一八七六年、爲清末秀才、耽丹墨、設塾授業。中歲移居香海、復遷席濠江、皆從事筆耕硯田、長過苜蓿生涯。閒來杯酒篇詩、以終其年。遺著有勺菴詩稿凡四百一十六首、乃由其婿陳君榮藻門人潘君家豪同爲校刊傳世。及見余少飄編輯之廣東歷代詩鈔。

伏波橋懷古

華蓋山青插翠微、太良峽口扁石扉。巨靈中劈神龍出、鞭向鑑江去如飛。鑑江蜿蜒水曲折、平鋪白練何清潔。神龍一去不肯還、鱗甲化石紅於血。鹿門山色十里來、輕舟直到石湖隈。就中不少興亡淚、灑向山川哭霸才。憶昔武王馳遠驚、伏波銜命樓船渡。戰雲朝壓浮邱山、鬼雄夜哭臣佗墓。石門天險尚難關、金陟孤村胡足恃。百粵爲家歷幾時、滄桑遺迹不復知。惟見海門石不轉、萬檣湊泊神妃祠。吁嗟乎、五嶺北來開南部、那得魃結長終古。干戈消息孕文明、豈獨滇池振銅鼓。五山西峙夕陽中、盈盈衣帶水流東。指點廢營舊戰血、千年化作木棉紅。

訪邑容奇雨花寺何不偕先生墓

雲橫大鳳路紆盤、訪得遺碑幸未殘。宿草獨流皋羽淚、青山常護遠公壇。嘔心血化千年碧、題額書留十字丹。我亦崎嶇丁百六、時危方悟古人難。墓在雨花寺後小浮沙岡寺前有何不偕先生墓道墓碑由蘇珥篆額

太平山塔影

太平湧出峽門開、塔影凌空亦壯哉。偶附片帆浮海去、不隨亂日下山來。尖同碧華應難削、高壓青雲未許陪。最好深林人靜後、遠擎返照落蒼苔。《太平塔與青雲塔合稱鳳城雙塔》

寶林寺鐘聲

山門龍象近人煙、梵殿鐘聲慧業圓。明月上方傳法響、疏星半局警愁眠。故人尚識紗中句、獨客誰憐江上船。百八蒲牢敲澈後、西風吹落石湖邊。

橫水渡

臨江待渡憩征塵、一葦能航一葉身。彼岸即爲歸著地、橫流同是過來人。滿隄楊柳初停槳、半壁風波莫問津。名士自迎桃葉去、那知擊楫痛沉淪。

避雨亭

方亭誰闢俯江邊、避雨人來意灑然。無笠屐時纔駐足、有風波後暫停鞭。四圍綠漲湖心水、一角烏雲檻外天。久立不知涼浸骨、芭蕉如海聳吟肩。

渡板沙尾海

輕舟東駛日光暹、次第煙波爲我添。雲腳畫成千丈直、海心湧出一沙尖。蕉林葉密礪樓見、荻港潮乾石蟹潛。臥數水程三十里、布帆不礙小於簾。

農村竹枝詞

爰採柔桑春日遲、雨映萬葉綠雲欹。小姑聶切關心甚、一紙新蠶孵卵時。

又

西江二月漲新潮、逐隊游鱗散種饒。忙刮陂塘平似掌、明朝瀦水育魚苗。

又

一村杙穀夕陽中、錢鏹初完刈穫功。此際江空天似燒、有人剗塹伺禾蟲。

出虎門口號

去國身如秋葉輕、虎門潛渡壯孤征。水因礁激能成籟、山被雲拏莫辨名。半壁鼓鼙思猛士、百年營壘倚雄城。此行津吏無譏察、穩倩西風送幾程。

丁巳初度三首錄一

我今四十二、逝水悵流年。博士送我來、多士莫如天。天之位置人、模稜不瞭然。早歲好奇服、攻苦不自憐。寸心雄萬丈、雲路恩聯翩。年年馳遠道、遑識兒女牽。白髮漸侵尋、人事乖從前。謝絕汗漫游、歸擁百城專。閉戶弄丹墨、可卻病魔纏。愛閒如瘦鶴、習靜似枯禪。近結月泉社、高飲會群仙。生有斗酒藏、死有楹書傳。獨惜文章膚、至老尚拳拳。願作穎士奴、長結古人緣。

港居即景

年年耕硯敢云勞、轉幸風光眼福叨。晴後煙霞鷗夢闊、雨中燈火蟹樓高。畫圖金碧長洲絢、笠屐清閒謝朓豪。漫道壺中詩界窄、青山無限付吾曹。

桐兒病將半載不得歸視賦此寄示

路窮舟楫枉沈吟、眼底天涯骨肉心。客有靈龜能論卜、我如驚鳥怯歸林。欲緘藥費囊如水、怕寫家書墨似金。悄掣毬燈虛十起、無聊意緒夢中尋。

遊新界青山禪院四首錄一

屯門秀色列西屏、吐出青山分外青。留得元和遷客字、千秋椽筆鎮滄溟。山上有韓愈題碑唐代元和年間刻

遷席澳門南灣

九州洋望雪濤堆、入幕依人又一回。曉岸車聲疑雨急、夜江燈火識潮來。殘生病骨惟工臥、亂世家書總佞開。掛起南窗天水闊、鬢絲楊畔且徘徊。

六十有詠

好禪偏不脫儒衣、六十猶強善忍饑。書易健忘心血少、枕難偏就鬢毛稀。經秋人事成枯槁、入世生涯付杳微。卻喜種花憎種樹、應無高鳥到柴扉。

碧齋吟草

羅正國

先生字磐召、鄉籍待考、清代諸生。見溫汝能纂輯之粵東詩海卷六十三。

西疇早春

春氣入西疇、昀原凍漸休。桑柔宜織婦、土軟快耕牛。簑笠新添市、蒲荷晚下洲。欲知農事好、晴暖在村頭。

寄靜安家兄

百畝臨江水、聞君日往還。興來乘一葉、倦即臥三山。晚雨滋鋤力、春醪醉鶴顏。風流當老大、歲月遠相關。

祝黃俊升

認取青槐樹、幽齋淺淺成。梧桐生古韻、風雅發新聲。匣嘯雙龍出、軒迴獨鶴輕。向平今未老、五嶽信初程。

石林存稿

葉志學

先生字愛賢、別字石林、鄉籍待考、清代布衣、著有石林存稿、詩一章見溫汝能纂輯之粵東詩海卷九十五

荔枝灣避暑

南薰夾岸芰荷香、艤舸穠陰白晝長。訪古客來歌舞地、尋幽人在水雲鄉。溪頭竹影鳴天籟、樹底蟬聲送夕陽。游賞祇須娛野興、霸圖休更感滄桑。

逃虛閣詩鈔

張錦芳

先生字粲夫、號藥房、鄉籍龍江。清乾隆四十五年庚子、公元一七八零年舉人、清乾隆五十四年己酉、公元一七八九年進士、授翰林院編修。淹貫群籍、通說文、識籀篆分隸、深入漢室、以餘事爲山水花草、無不精妙、於詩之造詣尤爲深邃。與同邑黃虛舟、黎二樵、番禺呂石帆、並爲世稱嶺南四大家、又與欽州馮敏昌、同邑胡亦常稱嶺南三子、傳略見咸豐縣志、詩章見嶺南詩存。書畫見汪宗衍先生著廣東書畫徵略。

孤舟

春色大江浮、孤舟生暮愁、鄉關有明月、只近最高樓。

宿大通寺

何意尋幽數、都忘避俗難。法應無所住、心更遣人安。松老吟風細、江空受月寬。依然覺來往、經卷就僧看。

又

略約微通屐、溪塍浩繞門。向來攜酒客、多自賣花村。撲地樓梧影、霑衣煙雨痕。秋蟬強相聒、軋軋自朝昏。

送伯兄

多難仍傷別、臨歧強破愁。西風幾行淚、北雁一聲秋。書史干時用、鹽齏送老謀。生涯竟誰是、且莫動離憂。

玉階初歸

以我漠無向、憐君獨自歸。歡娛人事少、枵觸素心違。漸覺安新懦、行應悟昨非。書堂理燈火、歲晏好相依。

江皋次石鼎韻

春潮奪山綠、淼淼蕩平坡。越女解搖櫓、笛聲飛過河。尊前故人少、江上愁心多。明日西園契、憑誰繼永和。

偕虛舟過光孝寺自公房

自公池上屋、相就煮春茶。羅漢塵開絹、菩提雨侵紗。燕忙朝葺壘、蜂鬧晚排衙。龍目今年好、香聞幾樹花。

陳村

帆腳翦江行、扁舟半日程。木奴供歲計、魚婢入官征。戶以花爲業、村將酒占名。欲尋民部集、《謂歐崙山戶部也》五字說長城。

舟中和李載園韻

酒薄禁風力、詩成竟日曛。客裝輕似葉、鄉夢遠如雲。山色龍頭影、溪流龍眼紋。川程信遲速、幽興最憐君。

湘水

不盡三湘水、來從八桂林。遠循衡嶽麓、直下洞庭深。天地餘秋色、帆檣入暮陰。竹枝與蘭葉、終古動哀吟。

下贛石

夷險爭須臾、奔流況三百。連山半戴上、入水忽奇石。長年偶不戒、擊浪供一擲。每疑設天險、意在尼行役。我來積雨餘、冬漲平歇側。齊唱榜聲健、崖岸失頃刻。奇觀謝昔嗟、順境便初歷。卻愁滅沒處、犖确猶委積。物情有避趨、所及蓋咫尺。潛形巧相伺、蹉跌倍難測。我今亦意行、距卜憂慮釋。茲遊未可狎、灘盡歡今夕。

上十八灘

灘聲隱如雷、山色濃於染。昔去乘寒漲、擗石數星點。令來廉角出、突兀類崖隙。長風送高帆、未敵驚湍濶。輪頭一噴薄、檣纜屢磨颯。早泊戒昏黃、月淡天容斂。連灘知幾歷、四顧空雲崦、向來泯途窮、復此興一念。來舟豈不駛、放溜苦迴閃。吾道習坎艱、占需乃出險。前途孰自保、欲濟利用漸。終愧幽棲人、灘旁架巖廠。

瀆陽峽

午風峽角來、掀篷入皋石。兩崖作門立、拔起虧天色。巉絕無寸膚、巨靈何由擘。架閣信奇構、斷棧少遺跡。惟餘縈牽痕、磴與猿猱借。溱流左合瀆、勢欲群峭敵。轟轟不受縛、拗怒久未釋。灘石紛橫縱、似爲奔湍激。余心偶無競、俄頃視順逆。雷驚與電轉、供我一偃息。飛仙不可從、寄言謝樵客。

南歸道中和瑞夫落葉五首原韻

昔去尋春草、今還聽秋聲。秋聲隨我歸、先我入戶庭。我行如轉蓬、時過亦忘情。歸來與吾子、酌酒餐寒英。閒居感物化、俯仰遊太清。

青草湖同李載園

千里湘流綠到湖、湖頭草色未全蘇。黃陵廟口斑斑竹、落日春風聞鷓鴣。

平望尋譚辰山不遇

買魚沽酒松陵路、鴻雁來時水滿湖。何處綠簑青笠客、一帆秋雨宿菰蒲。

江上晚酌示璞園虛舟澧隅

臨水飄蕭鬢影摧、中年懷抱怯秋哀。坐來幾許存亡淚、月上潮平被酒回。

武溪謠

灘急瀧高說樂昌、計程何日到宜章、武溪來自鸕鷀石、持較離心未足長。

村居

生理朝來問舊鄉、年華物色共徜徉。薰人市有糟床氣、近水門多繭簇香。桑葉雨餘堆野艇、魚花春晚下橫塘。新絲新穀俱堪念、力作端能補歲荒。

整理落水書畫三首錄一

半脫裝池手重擊、試收餘燼眼猶明。英光深恃神能護、豪語難憑命可輕。於物多藏仍是累、與人同患得無情。潮痕狼籍相料理、寒具依然未許并。

英德道中

南山瞰江清若空、蒼壁題字苔蘚叢。我懷嘉祐六年記、舟怯英州三日風。孤城斗大漲痕縮、亂石雲屯樵徑通。攜取琴瓏壓臥具、煙嵐奇絕浮征篷。

吳門得李正夫書

幾紙鄉書弭櫂前、招尋異地渺無緣。吟成風雨還重九、夢落江湖又十年。燕雁來時朝伏枕、吳歛聽罷夜回船。淒迷虎阜山頭月、才話前塵意惘然。

題夏太常竹泉春雨卷爲宋芝山作

三丈溪藤玉萬竿、竿竿那僅銚金看。誰其寶者周仲子、世或比之王孟端。復有詩篇能寫照、即無泉石已生寒。舊藏最憶風篁好、葉葉秋聲墨未乾。

附圖

張錦芳爲黃景仁畫竹枝圖軸、按景仁字仲則、錦芳曾與之同應順天鄉試因而交稔、並同入都門詩社、時有唱酬。畫下款署辛丑三月二十八日、乃乾隆四十六年、公元一七八一年、時錦芳方三十五歲、景仁三十三歲、事載廣東書畫徵略。

張錦芳爲黃景仁畫竹枝圖軸



竹別子先生

辛丑三月二十日

張錦芳

